

APOKALUPO

Apokalupo vaḡa-foforina guruḡari

Apokalipsis (o Apokalupo) Grik garo ai anina ta tu “vevaḡa-fofori”. Mai buka tu Ioane na etoreato ekalesia doğorori imaima ruarua (7) ema Iesu ḡevaḡa-moḡoniani tarimari tanobara mabarana ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanai etoreato. Mai buka tu laġani 90 ema 96 fakari nuġanai ta etoreato, mo tu Iesu maki emaseto murinai vau.

Siri baregori mai Apokalupo bukana nuġanai tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ġena ura kara ġoirai dori ġeġoranī dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei irauirauri tata bene vaḡa-foforiri ġana uranai; 2) Asia Keina (o Minor) ai ekalesia doğorori imaima ruarua (7) moġeri bene kirari, e bene launagiři, ema ġevei-rakavato-ġoi nai bene kira-feifeiri ġana; 3) Genese ai vevaḡa-maġuri boioġana Barau na ekiraġiato moġa dokona bemoġonini e bevetore-korikorini bene vaḡa-fofori ginikaua ġana.

Ioane na mai Apokalupo bukana tu maiġesi eboioġaiato:

1. Keriso Barau na mareva baregona eviniato varina - karoa 1

2. Keriso vetuğunağı ġauveiri maitoma eveirini - karoa 2-3
3. Keriso ġena kokore varina - karoa 4-22

Ioane ġena mata-vanaġi guruġari

¹ Mai toretore maiġa tu Iesu Keriso ġenai Barau na kara evaġa-foforiato guruġana. Barau na eviniato, korana tu eurato, Iesu na ġena vetuğunaġi tarimari dori moġo ġeġorani dagarari bene vaġa-ribari ġana. Keriso na aneru etuġuato, ġena vetuğunaġi tarimana Ioane evaġa-ribaiato.

² Ioane na Barau ġena guruġa ema Iesu Keriso ġena vevarifiu eġitarito dagarari mabarari evari-flurito. ³ Mai peroveta guruġari beiaviani tarimana tu beverereni, ema mai peroveta guruġari, Ioane na etorerito maiġeri, beġe seġaġirini ema beġe korana-iaġirini tarimari maki beġe verereni. Korana mai dagara mabarari beġe ġorani ġarona tu varau beraġasi-rakava.

Ioane ġena vevaġa-namo guruġana ekalesia doġorori imaima ruarua (7) ġeri

⁴ Au Ioane, Asia tanobaranai ekalesia doġoromi imaima ruarua (7) atore-vinimini: Varevare-barra e maino tu ġomi ġemi ai bene tanu. Mo varevare-barra e maino tu etanuni, etanuto, ema ma beiägomani Barauna ġenana eiaġomani, ema iauka imaima ruarua (7) Barau ġena terona ġoiranai ġeruġani ġerina eiaġomani, ⁵ ema Iesu Keriso ġenana eiaġomani. Ĝia tu Barau ġena guruġa evaġa-moġoniani ema evaġa-foforiani ma vetuğamaġikauna ġesi. Ĝia tu mero guinena

mase na evariğisi-ğenoğoto, ema ġia tu tanobara vereri mabarari ġeri Vere.

Ğia na eura-vinirani e ġera rakava rarana na eġuriġi-fitogħorito,⁶ benamo Barau ġena Basileia doġorona tarimarai evaġa-iaġorato, ema Rubu Veaġa vereri ai evaga-iaġorato, ġia Tamana e ġena Barau vetuġunaġina bitana iaġo-vini ġana. Ĝia ġenai mareva baregona e seġuka bene tanu vanaqivanaġi! Amen.

⁷ Ĝoġitaia, ġia tu magube nuġana na eiaġomani, mata mabarari na beġe ġitaiiani, ġegwanuato tarimari na maki. Ema tanobara tarimari mabarari ġia koranai beġe taġi-rakavani. Mo tu moġoni. Amen.

⁸ Vereġauka Barau ekirani, “Au tu Alefa ema Omega, (giniguinen ema dokona), atanuni, atanuto, e ma baiāġomani, Iaru-korokoro Barrauna.”

Keriso Ioane ġenai eforito

⁹ Au Ioane, ġomi tarikakami ema Vereġauka ġena ġauvei tavei-vegogoani tarimagu. Au tu ġomi ġesi Iesu ġena maġuri nuġanai tamidigu-midigu sebonani, e Barau ġena Basileia nuġanai tatanusebonani, ema meto nuġari ai tavevaġa-gwaġiġini e taruġa-gwaġiġini. Au Barau ġena gurugħa aġobata-iaġiani ema Iesu varina gurugħari avaġa-moġonirini e akiraġi-foforirini ġaramanai tu, Patmos motumotunai ġea tore-raga-kwanegħuto.

¹⁰ Vereġauka ġena ġaro ai Barau Iaukana na eborogħiguto, benamo murigu ai garo baregona ta noġa moġo dudu guruna kavana aseġaġiato.

¹¹ Mo garo tu maiġesina ekirato: “Kara boġitarini dagħarari bukai bono tore-vanaġiri, benamo mai

ekalesia doğorori imaima ruarua (7) maiğeri ġeri bono tuğu-iāgori: Efeso, Smena, Pegamo, Taiatira, Sadis, Filadelfia ema Laodikea ġeri.”

¹² Aruġa-kureto, deikara na au evaġa-guruġaguto naġitaia ġana, benamo au na golo na lamefa torekauri ġeveirito dagarari imaima ruarua (7) aġitarito. ¹³ Mo lamefa torekauri dagarari vekaravari ai tu tarima ta noġa moġo Tarimarima Natuna kavana, ġena dabuġa tu mauka kenene evariġoto mo kwakuna fanafanana, ema kobana tu golo beletana na etore-ġeġeraġiato. ¹⁴ Ĝia debana ema ġuina tu kurokuro vulu kavana, snou noġa kuro-ġaroġaro, ema matana tu karava moreri noġa moġo ekimore-kimoreato-ġoi. ¹⁵ Ĝia kwakuna fanafanana tu auri boraborari karava na ġegaburini, benamo ġevei-ginikaurini nai ġeveġia-veġiani kavana. Ma garona tu ġaruka vovoka ġeġaru-gwadani gururi kavana. ¹⁶ Ĝia ġimana aroribana tu visiġu imaima ruarua (7) eġabirito, ma bokana na tu vetari baġana matana reketa-reketa raga-rakava-rakava eraka-rosito. Ĝia ġoirana ġitaġitana tu ġaroġota kirikiri, ġaro etorani mamana kavana.

¹⁷ Au na aġitaiato nai, kwakuna koranai aketo-tarito mase tarimana ta noġa moġo. Benamo ġia ġimana aroribana au iatagu ai etore-kauato, bena ekirato, “Asi nogari! Au tu giniguinenem ema dokona. ¹⁸ Au tu maġuri atanuni. Amaseto, senaġi toma au tu maġuri batanu-vanaġi vanaġini. Ema Mase e mase tarimari iaukari ġetanuni Gabuna (o Hades) kina tu au ġegu ai. ¹⁹ Moġesina

naima mai oğitarini dagarari mabarari bono tore-vanağıri, mai tu initoma ġetanuni dagarari ema ġoirai vauro beğea ġorani dagarari. ²⁰ Mai visiġu imaima ruarua (7) au ġimagu aroribai boğitari ema lamefa torekauri dagarari golo na ġeveirito imaima ruarua (7) anina vekuretoġħana tu maiġa: Visiġu 7 tu ekalesia doġorori 7 ġeri aneru. Ma golo na lamefa torekauri ġeveirito dagarari 7 tu ekalesia doġorori 7.”

2

Vevaġa-riba guruġana Efeso ai ekalesia doġorona ġena

¹ “Efeso ai ekalesia doġorona ġeri aneru tu maiġesi bono tore-vinia:

Ġimana aroribai visiġu imaima ruarua (7) eġabi-taġorini ema golo na lamefa torekauri ġeveirito dagarari 7 vekaravari na erakaoni tarimana ġena guruġa tu maiġeri. ² Goi ġemu veiġa namori, ġemu ġauvei nuġanai ġemu vekwaraġi ema ġemu vevaġa-gwaġiġi tu au ma ribagu. Ema au ribagu, tarima rakavari ġoi na asi boġabir-aġgerini, ema asi apostolo tarimari, senaġi tauġeri moġo apostolo tarimari ai ġevevaġa-iaġoni tarimari, maki ġoi na otovo-naġirito, benamo oribarito ġia tu ġofaġofa tarimari. ³ Au aragu ġaramanai meto ogoitaġoto, senaġi ovevaġa-gwaġiġito ema okokoreto, asi kota maki oruġa-moirato.

⁴ Senaġi mai dagara sebona moġo ġemu ai asi aura-viniani: Tovotovonai ġemu veuravini baregħona au ġegu ai otoreato-ġoi, moġa tu oiaġuiato.

⁵ Bono tuğamağī-ğenoğoi, ġoi tu kamasi oğabi-rağeguto, ma boketo tu ainai mani boa rağası! Ğemu rakava ġenana bono vetuğamağī-kure, be tovotovonai oveirito-ğoi veiğari ma bono veiri. Bema asi bovetuğamağī-kurenī ma asi borakakurenī nai, au tu baiağosini, benamo ġemu lamefa vağā-rugakauna dagarana gabuna na basi ġabiveğitaiani. ⁶ Senağı ġoi ġemu namo tu Nikolaita tarimari ġeri veiğā rakavari asi oura-vinirini. Moğeri veiğā tu au na maki asi aura-vinirini.

⁷ Ma seğana tarimana na Iauka Veağā na eklesia doğorori kara ekiravara-vinirini guruğarı tu bene seğagiri. Bekokoreni tarimana tu au na maoro baviniani, ġia mağuri ġauna, Barau ġena paradaiso ai etubuni dagarana, ġwağwana beganiani.”

Vevağā-riba guruğana Smena ai eklesia doğorona ġena

⁸ Smena ai eklesia doğorona ġeri aneru tu maiğesina bono tore-vinia:

“Giniguinenā ema dokona, e emaseto benamo ma emağuri-ğenogōito tarimana ġena guruğā tu maiğeri: ⁹ Ġoi meto ema midigumidigu ogoitağoni au ma ribagu, ema asi ġemu asi ġamu maki au ma ribagu. Senağı moğoni veğata ġoi tu farefare vovoka tarimamu! Mani tauğeri moğō ġevekirağını Iuda tarimari ġetoni tarimari na ġoi iatamu ai guruğā rakavari ġekirağırını guruğarı tu au ma ribagu. ġia tu dia Iuda tarimari korikori, a ġia tu Satani ġena doğoro tarimari. ¹⁰ Ġoirai midigumidigu tari dori ogoitağorini, senağı mo midigumidigu gariri asi bono vei. Bono ġitaia, ġomi

kotari tu Diabolo na betovo-naǵimini, be diburai betoremini, benamo monai ġaro gabanana (10) boǵo midigu-midiguni. Monai maki enabe bomaseni, senaǵi ġemu vetuǵa-maǵikau au ġegu ai tu bene tanu. Moǵesina boveini nai tu, maǵuri koronana bavinimuni.

¹¹ Ma seǵana tarimana na Iauka Veaǵa na eklesia doğorori kara ekiravara-vinirini guruǵari bene seǵagiri. Bekokoreni tarimana tu mase vaǵa-ruaruana na asi bevaǵa-rakavaianı.”

Vevaǵa-riba guruǵana Pegamo ai eklesia doğorona ġena

¹² “Pegamo ai eklesia doğorona ġeri aneru tu maiǵesina bono tore-vinia:

Ǵena vetari baǵana matana reketa-reketa ma ragari tarimana ġena guruǵa tu maiǵeri: ¹³ Au ribagu ġoi ainai otanuni. Ğoi tu Satani ġena vere seana evaǵa-ruǵa-tariato vanuǵanai otanuni. Senaǵina ġoi na au aragu tu ma moǵonimu ġesi okorana-iaǵiani, ġemu veǵabidadama au ġegu ai maki asi veǵata oraga-kwaneato. Antipas ġomi ġemi vanuǵa baregona nuǵanai ġevaǵi-maseato ġaronai maki, ġoi ġemu veǵabidadama tu asi oraga-kwaneato. Antipas tu ma vetuǵa-maǵikauna ġesi au varigu evaǵa-moǵoniato-ġoi ema ekiraǵi-foforiato-ġoi. Satani tu mani ġomi ġemi vanuǵa baregona nuǵanai etanuni. ¹⁴ Senaǵi dagara tari ġoi ġemu ai maniǵeri au na tu asi aura-vinirini. Tarima kotari ġoi rekemu ai maniǵeri tu Balam ġena vevaǵa-riba veiǵari roǵo ġekorana-iaǵirini. Balam na vevaǵa-riba kerererı

Balak eviniato nai, Isaraela tarimari egorikau-darererito, bena rakava geveito, kwaivakuku gevinirito buregarri geganirito ema mata-boraaga veigarri geveirito-goi. ¹⁵ Moaga kavana goi rekemu ai tarima kotari manigeri maki Nikolaita dogoro tarimari geri vevaaga-riba gofagofa veigarri gekorana-iaigarini. ¹⁶ Govetuugamaagi-kure! Bema asiingina nai tu, au goi gemu ai baiaagosi-garimoegini, benamo vetari bagana au murugu ai mainana basi vaaga-vevaigarini.

¹⁷ Ma segana tarimana na Iauka Veaaga na eklesia dogorori kara ekiravara-vinirini gurugari bene segaagiri. Bekokoreni tarimana tu, au na mana baviniani. Mai mana maiaga toma tu vekuretoaga etanuni. Ema giao tu au na fore kurokurona ta baviniani. Mo fore kurokurona iatanai tu ara variguna ta etoreato, mo tu ta asi beribani, begabiani tarimana na mogo beribiani.”

Vevaaga-riba gurugana Taiatira ai eklesia dogorona gena

¹⁸ “Taiatira ai eklesia dogorona geri aneru tu maiigesina bono tore-vinia:

Barau Natuna, matana tu karava moreri noaga mogo kimorekimore, ma kwakuna fanafanari tu auri boraborari karava na gegaburini, benamo gevei-ginikaurini nai gevegia-vegiani kavana, gena guruaga tu maiigeri: ¹⁹ Gemu gauevi, gemu veuravini ema vegabidadama, gemu vetugunaagi iagovini ema vevaaga-gwaigigi, ema toma gauevi

oveiani tu barego lelevaġi, tovotovonai oveirito-ġoi moġeri tu ovanaġirini. Moġeri mabarari aġita-iaġomarini, be ribagu.

²⁰ Senaġi mai dagara sebona ġoi ġemu ai maniġa tu asi veġata aura-viniani. Ĵoi tu Iesebel, tauġena moġo ekekiraġini peroveta vavinenā etoni maniġa, ġoi na tu oġabi-raġeani. Mani vavine ġena vevaġa-riba na au ġegu vetuġunaġi-iaġovini tarimari ġemata-boraġani ema kwaivakuku ġevinirini bureġari ġeġanirini. ²¹ Au na ġia tu ġena taimi aviniato, mo mata-boraġa veiġari na bene vetuġamagi-kure ġana. Senaġi ġia tu asi veġata eurani bene vetuġamagi-kure. ²² Moġa lorinai ġia tu genagena gabunai bafiu-kauani, monai bea midigu-midiguni. Ĝia ġesi veġura-vanaġi veiġari ġeveini tarimari maki ġia ġesi midigumidigu baregona beġe ġabi-sebonaiani. Bema ġia Iesebel ġena veġura-vanaġi veiġari na asi beġe vetuġamagi-kuren i nai tu, mo midigumidigu beġe ġabiani. ²³ Ĝia natuna maki au na bavaġi-maserini. Benamo monana ekalesia doġorori mabarari beġe ribani, au tu tarimarima nuġari iaġasiri ema ġeri tuġamagi aragaġirini tarimagu. Ema ġomi tata maki ġemi veiġa ilailari ai voimi bavinimini.

²⁴ Ĝomi Taiatira ai ekalesia kotari tu Iesebel ġena vevaġa-riba rakavari asi ġokorana-iaġirini ema Satani ġena iaunega vekuretoġari, dobuduri ġekiraġirini, tu asi ġoribarini. Ĝomi mani ġemi tu avaġa-guruġa korikorimini, ġemi ai meto ta tu asiġina ġinavuġi batore-kauani. ²⁵ Dagara baregona tu, mani kara ġemi ai maniġa,

moğā boğono ġabi-gitaria mo, au bana ġenoġoi-iaġoma.

²⁶ Bekokoreni ema au ġegu ura bekorana-iaġiani mo magona bea ġabiani tarimana tu, au na maoro baviniani, tanobara beseri beguine-iaġirini. ²⁷ Ĝia na tanobara beseri tu auri togoina na beġori-kaurini ma seġukana baregona ġesi, ma tano ġurori noġa bekwari-kira kirarini. Au na ġia seġuka baviniani, Tamagu ġenana seġuka aġabiato ilailanai. ²⁸ Ema ġia tu au na laġani visiġuna baviniani, (mo seġuka vetoġana). ²⁹ Ma seġana tarimana na Iauka Veaġa na ekalesia doġorori kara ekiravara-vinirini guruġari bene segaġiri.”

3

Vevaġa-riba gurugana Sadis ai ekalesia doġorona ġena

¹ “Sadis ai ekalesia doġorona ġeri aneru tu maigēsina bono tore-vinia:

Barau Iaukana imaima ruarua (7) ġia ġenai ġetanuni ema visiġu imaima ruarua (7) eġabitaġorini tarimana ġena guruġa tu maigeri: Ĝoi na ġauvei oveirini tu au ma ribagu. Tarimarima na ġoi ġekiraġimuni, ġekirani, “Mani ekalesia tu maġuri” ġetoni, senaġi korikorina ġoi tu mase otanuni. ² Notataġa, ġemu ai veġabidadama maġurina kotuna moġo dori emase-vaġini maniġea novaġa-kokorea. Korana au na ġoi ġemu ġauvei aġoitaġoato dia roroġoto au ġegu Barau ġoiranai. ³ Moġesina naima Vari Namona ġoseġaġiato ma ġoġabi-raġeato maniġa boğono

tuğamağia ema boğono korana-iağıa, be ġemi rakava ġerina ġovetuğamağı-kure. Bema asi botatağoni nai, au ġemu ai noğā moğō lema tarimana ta kavana baiağosini. Be kamara taimi ai basi rağasini, moğā tu asi kota maki boribaiani.

⁴ Senağı ġoi ġemu tarima kotari Sadis ai maniġeri, ġeri dabuğā asi kota maki ġevağā-miro-kararito. Ĝia maniġeri tu au ġesi bağā rakao-rakao vegogoni, ma dabuğā kurokurori bağā riğorini, korana ġia ġeri veığa tu iobukaiobuka bene. ⁵ Bekokoreni tarimana tu ġia kavari dabuğā kurokurori na bavağā-dabuğaiani. Au na ġia arana mağuri bukana na asi barumu-fitoğaiani, a au Tamagu ma ġena aneru ġesi ġoirari ai ġia arana bakırağı-foforiani.

⁶ Ma seğana tarimana na Iauka Veağā na eklesia doğorori kara ekiravara-vinirini guruğari bene seğagiri.”

Veağā-riba guruğana Filadelfia ai eklesia doğorona ġena

⁷ “Filadelfia ai eklesia doğorona ġeri aneru tu maiğesina bono tore-vinia:

Davida ġena ki, (veağā-mağuri kina), eğabi-tağōani tarimana, tarima veağana ema moğoni korikorina. Ĝia na kara bekeo-fakaiani, tarima ta na asi ma bekou-ğauani riba, ema bekouani dagarana ta na asi ilaila ma bekeoani riba. Mai tarima ġena guruğā tu maiğesina: ⁸ Ġoi ġemu ğauvei oveirini au ma ribagu. Noboğe, ġoíramu noğitaia, ġoi ġoíramu ġatama bokana tu bakeo-fakaia, ma tarima ta asi ġena seğuka ma bekouani. Au ribagu ġoi ġemu kokore

tu misina mođo, senađi au ġegu guruġa tu oġabi-gitarato, ema au aragu maki asi okira-ġuniġauato. ⁹ Bono ġitaia, mani Satani ġena rubu tarimari maniġeri tu tauġeri ġevekirāġini Iuda tarimari ġetoni, senađi ġia tu dia Iuda tarimari. Ĝia maniġeri tu au na baġabi-iāġosirini, ġoi kwakumu koranai beġeasi tutuġu-tarini. Benamo beġe riba-maoroni, ġoi tu au na auravinemuni. ¹⁰ Goi tu au ġegu vevaġa-nađi guruġari okorana-iāġirito ma ovevaġa-gwaġigito naima, tanobarai veribaġani taimina bevotuni nai, ġoi tu baġitaġau-ġinikaumuni. Mo veribaġani na tu mai tanobara iatanai ġetanuni tarimari mabarari batovo-naġirini. ¹¹ Au tu dori aiaġosini. Kara oġabiato maniġa tu bono ġabi-gitaria, be tarima ta na ġemu korona, ġemu kokore auna, asi bene ġabia. ¹² Bekokoreni tarimana tu au Tamagu ġena Rubu Veaġana duġuna tarimanai bavaġa-iāġoani. Mo gabu asiġina ġinavaġi ma beiägħiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ierusalema variġuna tu au ġegu Barau ġena siti, ma mai siti maiġa tu guba na au Tamagu ġenana bemariġoni. Au aragu variġuna maki ġia ġenai batoreani.

¹³ Ma seġana tarimana na Iauka Veaġa na eklesia doġorori kara ekiravara-vinirini guruġari bene seġaġiri.”

Vevaġa-riba guruġana Laodikea ai eklesia doġorona ġena

¹⁴ “Laodikea ai eklesia doġorona ġeri aneru tu maiġesina bono tore-vinia:

Guruğā moğoni korikorina ekirağiani tarimana arana Amen ġenana eiağosini. Ĝia tu ma ġena vetuğamağikau e Barau ġena guruğā evağā-moğoni korikoriani ema ekirağı-foforiani tarimana, ema Barau na eveirito dagarari mabarari ġenana ġeiağomato tarimana ġena guruğā tu maiġeri:

15 Goi ġemu ġauvei oveirini au ma ribagu. Au ribagu, ġoi tu dia faraka ema dia seğuka. Au ġegu ura sebona ġoi tu boro faraka moğo o boro seğuka moğo! **16** Senaġi ġoi tu seğuseğu, a dia seğuka moğo o dia faraka moğo. Moġesina naima ġoi tu au bokagu na bakanunu-fitogamuni. **17** Goi tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavağā-vegogori, be au tu ilaila, kara ta asi ma atuğamağiani.’ Senaġi ġoi tu asi oriba-maoroni ġoi tu madi kekei ma vetuğamu, asi ġemu asi ġamu, ġoi tu mata-bubu ema asi dabuğamu, korimu. **18** Au na ġoi asisibavinimuni, akiramuni, au ġeguna golo bono voi. Korana auna golo tu karava na evağā-veveato, benamo momori mabarari tu ġeiarevarito. Be au ġegu ai mai golo bovoiani nai tu, botagħani. Ema dabuğā kurokurori maki bono voi, be bono ved-abuğā-iaġi, kefimu korina maiakana bono kouġaua. Ema mata muramurana maki bono voi, be matamu ai bono torea, bema bono boġeboġe.

19 Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veiġa bono tuğamağī-ginikaua, benamo bono vetuğamağī-kure ma bono raka-kure.

20 Noseğagħi! Au ġatama-bokai aruğā-taġoni ma afidifidini. Bema tarima ta na au garogu be-

segaġiani, benamo ġatama-boka bekeo-fakaiani nai, au baraka-toġani, benamo ġia ġesi baġa ġaniġanini ema ġia maki au ġesi beganiġanini. **21** Bekokoreni tarimana tu au na maoro bavini-an, au ġesi ġegu teronai baġa tanuni. Au kavana, au akokoreto nai Tamagu ġena teronai Tamagu ġesi ġatanuni.

22 Ma seġana tarimana na Iauka Veaġa na eklesia doġorori kara ekiravara-vinirini gurugari bene seġaġi.”

4

Barau ġena terona gubai

1 Maiġa murinai au aboġe-iaġoto tu, ġatama-boka vekeofaka-taġo guba vanuġanai aġitaiato. Benamo garo ta kibi guruna noġa, mo tovotovonai aseġaġiato garona moġa ekirato, “Maiġana noma raġe, be maiġa murinai kara dori ġeġorani dagarari nama vaġa-ġitamu.”

2 Asikauna Iauka Veaġa na eborogħiguto, benamo ġoiraġu ai tu tarima ta guba teronai etanu-taġoto-ġoi aġitaiato. **3** Mo teronai etanu-taġoto-ġoi tarimana vetoġana tu fore arana iaspä ġekimore-kimorerini marevari, ema fore kakakakari arana kanelia marevari kavana, marevana tu irau moġo. Ma mo terona tu kevau na eġeġeraġiato. Mo kevau vetoġana tu noġa moġo emeral forena kavana. **4** Mo terona moġa tu terona gabana ruarua ma vasivasi (24) na ġetore-ġeġeraġiato. Ma mo terona 24 ai tu veġitaġau tarimari baregori tata ġetanuto. Ĝia mabarari tu dabuġa kurokcuri moġo ġeriġoto, ema tata debari ai tu

golo koronari sebori sebori ġeveito. ⁵ Mo terona monana kiriku ekimoreato-ġoi, garo baregori ema ġaita eragato-ġoi. Ma mo terona ġoiranai tu lamefa imaima ruarua (7) ġeġarato-ġoi. Mo lamefa ġeġarato-ġoi moġeri, mo tu Barau iaukana imaima ruarua (7). ⁶ Ema mo terona ġoiranai maki davara veġiaveġiana, nega-vaġuravaġura aisi kavana.

Ma maġuri dagarari vasivasi (4) tu nuġana buroburonai, mo terona ġeruġa-geġeraġiato. Ĝia ġoirari ema muriri tu matari tu ġutuma. ⁷ Mo maġuri dagarana guinena tu noġa moġo laion, vaġa-ruaruana dagarana tu noġa moġo boro-makau tauna, vaġa-toitoina ġoirana tu tarimima kavana, ema vaġa-vasivasina tu noġa moġo erovoni ugavana kavana. ⁸ Mai maġuri dagarari maiġeri tata faneri tu imaima sebona (6), ma mai faneri maiġeri mabarari tu mata na moġo ġevonuto, faneri nuġana rekeri dagarari maki mata moġo. Ĝia tu vanaġivanagi boġi-laġani asi ġeiaġaraġini, mai guruġa maiġa asi ġevaġa-ketoani, ġekirani:

“Veaġa, veaġa, veaġa,
Vereġauka, Barau tuġutuġu, tu veaġa,
guinenai etanuto-ġoi,
maitoma maki etanuni,
ema ma beiaġomani!”

⁹ Mai teronai etanu-taġoto-ġoi tarimana tu maġuri etanu-vanaġi vanaġini. Ma maiġeri maġuri dagarari na mo teronai etanu-taġoto-ġoi tarimana ġevaġa-raġeato-ġoi, e ma vegubakauri ġesi ġetoma-rakariġoato-ġoi, ema ġetanikiuviniato-ġoi nai, ¹⁰ mo veġitaġau tarimari baregori

gabana ruarua ma vasivasi (24) tu mo teronai etanuni tarimana ġoiranai ġevetui-tarito-ġoi. Benamo mai maġuri etanu-vanaġi vanagini tarimana ġetoma-rakariġo viniato-ġoi. Ĝeri korona maki ġia ġoiranai ġetore-taririto-ġoi, benamo ġekirato-ġoi,

11 “Ĝai ġema Vereġauka ema Barau,
ġoi tu iaru-korokoro,
be tarimarima ema maġuri dagarari mabarari
na ġoi tu beġene vaġa-raġemu, beġene
gubakaumu,
ema seġuka maki mabarana ġoi ġemu.
Korana dagara mabarari tu
ġoi na oveirito,
ema ġoi ġemu urai moġo oveirito
ema initoma ġetanuni.”

5

Mamoe natuna ema toretorefefana maukana

1 Benamo aboġeto, mo teronai etanu-taġoto-ġoi tarimana ġimana aroribai tu toretorefefana maukana ta aġitaiato. Mo fefa tu tavitatavitai ma toretorena, ġeiokuato, ema vaġa-imaima ruarua (7) veġata ġekada-ġauato. Mo ġekada-ġaurito gaburi mabarari tu tabu vetoġana ġetoreato. **2** Ma gwada rakavarakava aneruna ta aġitaiato, garona tu asikeikeina eġobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?” **3** Senaġi tarima ta gubai o tanobarai o tanobara gaburenai ta asi ilaila veġata mo fefa bekeo-fakaiani ema nuġanai

beboğe-ğurani. ⁴ Benamo atağı-rakava raka-vato, korana tarima sebona kwarikwari ta maki asi veğata ğegoitağoto, mo fefa maukana ma toretorena bekeoani ma nuğanai beboğe-ğurani. ⁵ Benamo mo veğitağau tarimari baregori ta na ekiraguto, ekirato, “Asi notağı! Noboğe! Iuda doğorona ġeri laion, Davida Natuna nogitaia, ġia tu ekokoreto. ġia na mani fefa maukana ma toretorena bekeoani bene, ema mani ġekumuato kumukari taburi imaima ruarua (7) maki bekokirini bene.”

⁶ Benamo aboğeto, Mamoe Natuna ağıtaiato. ġia tu terona nuğana buroburonai eruğatağoto-ġoi, mo mağuri dagarari vasivasi (4) ema veğitağau tarimari baregori tu ġeruğağegeraġiato. Mamoe Natuna ġitagħitana tu tari na ġevaqi-maseato. ġia guduna tu imaima ruarua (7) ema matana maki 7. Mo tu Barau iaukana 7 ekiraġirini. ġia tu Barau na tanobara mabarana ġana etuġu-iāgorito. ⁷ Mamoe Natuna eiaġoto, benamo teronai etanu-tağoto-ġoi tarimana ġimana aroribaini mo fefa maukana ma toretorena moġa eġabiato. ⁸ Fefa maukana ma toretorena eġabiato nai, mağuri dagarari vasivasi ema veğitağau tarimari baregori 24 Mamoe Natuna ġoiranai ġevetui-tarito. ġia tata tu ma ġeri hap (gita noġa) ema golo ġurrori nuğari ai tu muramura goġuna ma bonari. Mo goġu ma bonari tu Barau ġena tarima veaġari ġeri ġauğau guruġari. ⁹ Benamo ġia na mari variġuna ta maiġesina ġemariato,

“Goi na fefa maukana ma toretorena boġabiani ilaila,

ema ġia kumuna ma taburi maki bokeo-fakarini
ilaila,
korana ġoi tu ġevaġi-masemuto,
ma ġoi raramu na tau vavine Barau ġena ovoi-
vaġirito doġoro mabarari ġerina, e garo
mabarari ġerina, ema bese mabarari ema
tanobara mabarari na.

10 Ĝoi na ġia tu Barau ġena Basileia doġorona
tarimari ai ovaġa-iaġorito,
ema Barau vetuġunaġina beġene iaġo-vini ġana
Rubu Veaġa vereri ai ovaġa-iaġorito.
Ĝia tu tanobara mabarana iatanai beġe
veġorikauni.”

11 Ma aboġe-iaġoto, aneru garori asisebo-
asisebo aseġaġirito. Moġeri aneru tu asi iavi-
iaviri, milion ġutuma maki ġevanāġirito. Ĝia
na terona ema maġuri dagarari vasivasi ema
veġitaġau tarimari baregori ġeruġa-geġeraġirito.

12 Ma mai mari ġemari-gigitriato,
“Mamoe Natuna,
ġevaġi-maseato dagarana,
tu ma ġena maoro, seġuka beġabiani,
e farefare vovoka, e iaunega,
ema kokore beġabiani!
Ema ġia ma ġena maoro tarimarima mabarari na
beġe gubakauani,
ma beġe vaġa-raġeani
ema beġe vonevone-raġeani!”

13 Benamo Barau na eveirito dagarari mabarari
guba nuġanai, tanobara iatanai, tanobara gabu-
renai, e davara nuġanai dagarari mabarari na
mai mari ġevaisiato aseġaġirito,
“Teronai etanu-taġoni Barauna

ema Mamoe Natuna,
tauri ruarua na vevaḡa-raḡe,
vegubakau, mareva baregona,
ema seḡuka beḡene ḡabiri,
bene iaḡo mo vanagivanaḡi asi magona!”

¹⁴ Benamo maḡuri dagarari vasivasi na ḡevaḡa-moḡoniato, ḡekirato, “Amen!” Ema veḡitaḡau tarimari baregori 24 ḡevetui-tarito, Barau ḡetomarakariḡo viniato.

6

*Fefa maukana ma toretorena ḡekumukaiato
kadari o tabu vetoḡari Mamoe Natuna na ekeorito*

¹ Benamo au na Mamoe Natuna aḡitaiato, fefa maukana ma toretorena vaḡa-imaima ruarua (7) ḡekada-tariato dagarana kadana giniguinenā ekeo-fakaiato. Moḡa ekeoato-ḡoi nuḡanai tu, maḡuri dagarari vasivasi fakari ai ḡia ta eguruḡato, garona tu noḡa guba eguruato, ekirato, “Noiaḡoma!” ² Aboḡe-iaḡoto nai tu, hosi kurokurona ta aḡitaiato, eraḡeto tarimana ġimana tu ma fevana, ema ḡia tu korona ta maki eviniato. Ġia eraka-rosito tu, vetari ai ekokoreto-ḡoi ema eiaḡoto tu ma bene kokore ḡana.

³ Benamo Mamoe Natuna na kumuka vaḡa-ruaruana kadana ekeo-fakaiato nai, maḡuri dagarana vaḡa-ruaruana aseḡaḡiato, ekirato, “Noiaḡoma!” ⁴ Benamo hosi ta ma eraka-rosito. Moḡa tu hosi kakakakana. Eraḡeto tarimana tu

seguka eviniato, tanobara na maino bene ġabi-veġitaia, be tarimarima tauġeri beġene vevaġi-masemase ġana. Mo tarima tu vetari baġana asikeikeina ta eviniato.

⁵ Kumuka vaġa-toitoina kadana ekeo-fakaiato nai tu, maġuri dagarana vaġa-toitoina aseġaġiato, ekirato, “Noiaġoma!” Au aboġe-iaġoto nai, hosi dubadubana aġitaiato, eraġeto tarimana ġimanai tu dagara ġeri meto vaġa-foforiri o sikele dagarana ta eġabiato. ⁶ Benamo au na garo ta maġuri dagarari vasivasi (4) fakari na eiaġomato aseġaġiato, ekirato, “(Bita doġe be), widi kilo sebona davana tu ġaro sebona ġauveina voina, ema bali (widi kavana) kilo toitoi davana tu ġaro sebona ġauveina voina. Senaġi olive digħana ema vine nanuna tu asi boġono vaġa-rakavari.”

⁷ Ma Mamoe Natuna na kumuka vaġa-vasivasina kadana ekeo-fakaiato nai tu, maġuri dagarana vaġa-vasivasina aseġaġiato, ekirato, “Noiaġoma!” ⁸ Aboġe-iaġoto nai tu, hosi ta aġitaiato, tauġanina ġitaġitana noġa kurokuro. Eraġeto tarimana arana tu Mase, ma mase tarimari iaukari ġetanuni Gabuna (o Hades) tu ġia murina na eraganaġi-ragħanaġito-ġoi. Tauri ruarua seġuka evinirito, tanobara taviri vasivasi nuġanai tavi sebona beġene ġita-ġaua, be vetari ai, doġe ai, keve rakavari na, ema boġai ġetanuni veġganiveġani dagarari na tarimarima beġene vaġi-maseri.

⁹ Ma kumuka vaġa-imaimana kadana ekeo-fakaiato nai tu, Barau ġena guruġa ġaramanai, e mo guruġa ġevaġa-moġoniato ema ġevāri-fiuato ġaramanai ġevaġi-maserito tarimari iaukari

mağuri fata veağana gaburenai ağıtarito. ¹⁰ Ĝia mabarari ĝekoĝo-baregoto, ĝekirato, “Vere tuğutuğu, goi tu veağā ema moğoni veğata, aitoma vau ġoi na tanobarai ġetanuni tarimari bovağā-maoro vinirini, benamo ġai rarama ĝevağā-riğorito bovağā-voirini?” ¹¹ Benamo ġia mabarari tata dabuğā kurokurori evinirito, ekirarito, negakota roğō ma beğene naritari etato. Beğene vağā-noga mo, ġia karori toma vetuğunaġi ġeiağō-vinini tarimari ema tarikakari kotari, ġia ġevagirito kavana, beğe vağī-maserini mo, ġeri numera korikori bene ġabia.

¹² Au na Mamoe Natuna ağıtaiato, kumuka vağā-imaima sebona (6) ekeo-fakaiato nuğanai, tano-iaga asikeikeina eragato, e ġaro edubadubato, dabuğā dubadubari noğā, e ġue evezurevoto, ekakarato rara kavana. ¹³ Ema guba na visığu ġeketo-firiğoto tanobara ġana, noğā figi mağitari iavara na figi ġauna na erukuketo ketorini kavana. ¹⁴ Guba maki erekwarekwato, noğā moğō fefa maukana, ġetoretore-iağiani dagarana, ġeiokuoni kavana. Ma ġoro ema motumotu mabarari gaburi ekoki-veğitarito. ¹⁵ Benamo tanobara kiniri, e vereri, e vetari ġitağaua tauri baregori, e ġeri farefare asisebo tarimari, e kokore rakavarakava tarimari, tuğurakaorakao tarimari ema mağuri namona e fakanai ġetanuni tarimari, ġia mabarari kouğā nuğarı ai ema ġoro ai fore baregori vekaravari ai ġea gumuto. ¹⁶ Benamo ġoro ema fore baregori ġenoğirito, ġekirato, “Ĝai iatamai ġoma ketokau, ġoma lautarima, be teronai etanuni Barauna ġoirana ġenana ema Mamoe Natuna ġena baru

baregona ġenana ġoma kure-toġama! ¹⁷ Korana ġia ġeri baru ġarona baregona tu varau bevotu, deikara beruġa-tarini riba?”

7

Barau ġena vetuġunaġi tarimari 144,000

¹ Moġa murinai aneru vasivasi (4) aġitarito, tanobara daiguniri vasivasi ai ġeruġato. Mo aneru na tu tanobara iavarari vasivasi ġelautaririto, tanobarai e davarai asi beġene raga, ema ġau maki asi beġene kwari-ġarevari ġana. ² Ma murinai tu aneru ta ma aġitaiato, ġaro eraġeni rekena na emaraġeto. Mo aneru na maġuri Barauna ġena vevaġa-moġoni vetoġana o makana eġabi-taġoato-ġoi. Ĝia na mo aneru vasivasi, Barau na seġuka evinirito tanobara ema davara beġene vaġa-rakavari aneruri, efararavinirito, ekirato, ³ “Tanobara, davara, ema ġau asi roġo boġono vaġa-rakavari, bene iaġo mo, Barau ġena vetuġunaġi tarimari bakuri ai ġia ġena vetoġa baġana toreri murinai vau.” ⁴ Moġa murinai Barau ġena vetoġa bakuri ai ġetoreriго tarimari mabarari tu 144,000 aseġaġiato. Ĝia tu Isaraela doġorori gabanana ruarua (12) mabarari ġerina, doġorori tu maiġeri:

⁵ Iuda ġena doġoro tarimari - 12,000

Reubena ġena doġoro tarimari - 12,000

Gad ġena doġoro tarimari - 12,000

⁶ Asere ġena doġoro tarimari - 12,000

Naftali ġena doġoro tarimari - 12,000

Manase ġena doġoro tarimari - 12,000

⁷ Simeona ġena doġoro tarimari - 12,000

Levi ġena doğoro tarimari - 12,000

Isakara ġena doğoro tarimari - 12,000

⁸ Sebulun ġena doğoro tarimari - 12,000

Iosefa ġena doğoro tarimari - 12,000

Beniamina ġena doğoro tarimari - 12,000

Tarima ġutuma lelevaġi dabuġa kurokurori ġeveito

⁹ Moġa murinai aboġe-iaġoto, tarima ġutuma lelevaġi, asi tau iaviġosina, aġitarito. Mo tu tanobara irauirau mabarana tarimana, e doğoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ĝia mabarbarari tu terona ema Mamoe Natuna ġoirari ai ġeruġato. Ĝia mabarari dabuġa maukari kurokurori ġeveito, ema ġimari ai tu galamo lauri noġa dagarari ġegħabito. (Mo tu ġia ġeri kokore vetoġari).

¹⁰ Ĝia ġekogo-baregħoto, ġekirato, “Vevaġa-maġuri tu ġita ġera Barau, teronai etanukauni Barauna, e Mamoe Natuna ġerina eiaġomani.” ¹¹ Ma aneru mabarari na tu terona e veġitaġġau tarimari baregori ema maġuri dagħarari vasivasi (4) ġeruġa-ġeġeraġirito. Benamo Barau ġena terona koranai ġivetui-tarito, ġoirari tano ai, Barau ġetomarakarīgo viniato, ¹² ġekirato, “Moġoni veġata! Vevaġa-raġe, e mareva baregħona, e iaunega, e vevaġa-namo, e vegħbok, e seġuka, ema kokore tu ġita ġera Barau ġena toma bene iaġo vanaqvānaġi, Amen!

¹³ Benamo veġitaġġau tarimana baregħona ta na edanāġiguto, ekirato, “Mai dabuġa kurokurori na beġe vedabuġa tarimari tu deikara, ema ġia

tu ainana bege iagomā?” ¹⁴ Benamo avaḡa-veseto, akirato, “Gegu vere, au asi ribagu. A ġoi tu ribamu.” Benamo ġia na ekira-varaguto, ekirato, “Mai tarima maiġeri tu midigumidigu baregori nuġari na ġeiaġomato. Ĝeri dabuġa tu Mamoe Natuna, ginitaġo mamoenā, rarana na ġevei-kurokuro-rito. ¹⁵ Moġesina naima, ġia tu Barau ġena terona ġoiranai ġeruġani, ema ġena Rubu Veaga nuġanai bogi-laġani ġia vetuġunaġina ġeiaġo-vinini. Ema teronai etanuni Barauna na enari-ġaurini. ¹⁶ Ĝia tu asi ma bege vitoġenogoirini, e bokari asi ma bege koke-ġenogoini. Ĝaro iatari ai asi ma bekirini ema ġaro seġukana na asi ma begugurarini. ¹⁷ Korana terona nuġanai etanuni Mamoe Natuna na beġita-ġaurini. Ĝia na beġori-iaġorini maġuri nanuna eġaruani gabuna ġana. Ema Barau na matari gorari mabarari bedau-vaġirini.”

8

Kumuka vaġa-imaima ruaruana (7) kadana

¹ Mamoe Natuna na kumuka vaġa-imaima ruaruana (7) kadana ekeo-fakaiato nai, guba vanuġanai aoa tavina ta veġata guru ta maki asi eraġeto. ² Benamo Barau ġoiranai ġeruġato aneruri imaima ruarua (7) aġitarito, dudu 7 evinirito.

³ Benamo aneru ta ma eiaġomato, fata veaġana sevinai eruġato, ġimħanai tu golo ġurona ta. Ĝia tu muramura ma bonana barego lelevaġi ġeviniato, Barau ġena tarima veaġari ġeri ġau-ġau ġesi terona ġoiranai golo fatana veaġanai Barau bene

varevare-vinia ġana. ⁴ Mo muramura goġuna ma bonana goġuna ema Barau ġena tarima veaġari ġeri ġaġgau ġesi, mo aneru ġimana na ġevarageto Barau ġoirana ġana. ⁵ Moġa murinai aneru na golo ġurona eġabiatu, fata veaġana karavana na evaġa-vonuato, benamo tanobara iatana ġana efiu-riġoato. Monana ġaita guruna eraġeto, garo gururi tari ġeraġeto, e kiriku eragato, ema tano eiagato.

Aneru na ġeri dudu ġefurururito

⁶ Benamo aneru imaima ruarua (7) ġeri dudu ġeġabi-torerito, beġene furururi ġana. ⁷ Aneru giniguinen na ġena dudu efururuato, benamo aisi foreri misimisiri ema karava rara ġesi ġesebonato ġevetoreto. Benamo moġeri mabarari tanobara ġana ebubu-riġorito. Ma tanobara tavi toitoi nuġanai tavi sebona eġara-ġosiato, ġau toitoi nuġari ai tu sebori tu ġegħara-ġosirito, e ġaġa ema reġi mabarari ġegħara-ġosirito.

⁸ Aneru vaġa-ruaruana na ġena dudu efururuato nai tu, dagara ta, ġoro-dagara-bara ta noġa ma karavana, davarai evefiu-reito. Benamo daġaru-bara tavi toitoi nuġanai tavi ta tu rarai eiaġoto. ⁹ E daġaru-bara maġuri dagarari toiri-toiri nuġari ai sebori tu ġemaseto, e bouti toiri-toiri nuġari ai sebori tu ġeburuto.

¹⁰ Aneru vaġa-toitoina ġena dudu efururuato nai tu, visiġu-dagara-bara ta kere morena kavana guba na eketoto, benamo ġaruka toiri nuġari ai sebori ai, e ġegħarūgarurini nanuri ai eketo-reito. ¹¹ Mo visiġu arana tu “Mamaki”. Nanu gaburi

toiri nuğari ai sebori tu ġemamakito. Benamo tarimarma vovoka na mo nanu mamakiri ġeniurito nai ġemaseto.

¹² Aneru vaġa-vasivasina ġena dudu efururuato nai, ġaro e ġue ema visiġu tu taviri toitoiri nuğari ai tavi sebori tu ġesemorito, naima mo tavi toitoiri nuğari ai tavi sebori tu ġemukunato. Moġa lorinai ġaro mamana tavi toitoi nuğanai tavi sebona tu asi emamato, ema boġi tavi toitoi nuğanai tavi sebona ta ġue e visiġu tu asi emamato.

¹³ Benamo aboġeto, ugava ta guba tuġuna vanigerenai erovoto-ġoi aġitaiato, maiġesi ekeafararato, ekirato, “Tanobarai ġotanuni tarimami, vetuġami kika! Vetuġami kika! Vetuġami kika! Korana tu aneru toitoi, ġeri dudu roġosi ġere furururi aneruri, na ġeri dudu beġe furururini gururi ai tu, meto ema midigumidigu barego lelevaġina beġoranı.

9

Dudu vaġa-imaimana (5)

¹ Aneru vaġa-imaimana na ġena dudu efururuato, benamo visiġu ta aġitaiato, guba na eketoto tanobarai. Mo visiġu tu guri variġo kwareġħana, (iauka rakavari ġeri dibura), kina eviniato. ² Mo guri ekeo-fakaiato nai tu, goġu evebubu-rosito noġa moġo karava baregona goġuna kavana. Benamo mo guri goġuna na ġaro mamana ema guba fakana emukuna-ġaġurito.

³ Goġu nuğana na madudu ġeraka-rosito tanobarai, ema seġuka evinirito, seġukana tu kavikavi seġukari kavana. ⁴ Ĝia ekirarito, tanobarai ġaġa

ta, e tanobarai ġetubuni dagarana ta, ema ġau ta asi beġene vaġa-rakavaia, senaġi deidei bakuri ai Barau ġena vetoġa o maka asi etanuni tarimari moġo beġene vaġa-rakavari etato. ⁵ Ekirarito maki, mo tarima asi beġene vaġi-maseri, senaġi ġue imaima (5) nuġanai beġene vaġa-midigu midiguri. Mo midigumidigu ġeġanito moġeri tu kavikavi na tarima ekavirini midiguna kavana. ⁶ Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ĝeri ura baregona ġemase beġe toni, senaġi mase ġerina beveġitani.

⁷ Mo madudu ġitaġitari tu hosi noġa, ġea vetrari ġana ġeruġa-toreto. Ĝia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana. ⁸ Ĝiri tu vavine ġuire noġa moġo, doğari tu laion doğari kavana. ⁹ Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetrari nuġanai ġeraka-toġani gururi kavana. ¹⁰ Ĝia tu ma ġiġuri, ema ġiġuri bonari tu kavikavi ġiġuri bonari kavana. ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni. ¹¹ Ĝia tu ma ġeri vere baregona o kini. Ĝia na eġita-ġaġurini. Ĝia dagarana tu mo guri variġo kwareġħana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaġa-rakava kwaikwai tarimana).

¹² Rakava baregori giniguinen tu bekori moġa, ma ruarua tu vau beġe iaġomani.

Aneru vaḡa-imaima sebona (6) na dudu efuru-ruato

¹³ Aneru vaḡa-6 na ġena dudu ma efururuato, benamo fata veaġana daiguni vasivasi ai gudu vasivasi moġeri ġerina garo ta eiaġomato aseġaġiato. Mo fata tu golo na ġeveliato, ma Barau ġena terona ġoiranai etanuni. ¹⁴ Mo garo na aneru vaḡa-6 na ma ġena dudu moġa ekiriatoto, ekirato, “Aneru vasivasi, ġaruka baregona arana Eufrate ai ġebaru-taririto, moġeri noruġa-vagiri.” ¹⁵ Benamo mo aneru vasivasi eruġa-vagiritu, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia. ¹⁶ Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato. ¹⁷ Mo hosi e iatari ai ġeraġeto tarimari au ġegu mata-vanaġi ai vetoġari tu maiġesina aġitarito: Ĝia kobari kouġauna ġana auri dabuġana tu karava ġegħarani kakakaka karavari kavana, e blu, ema karava moreri o salfa borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito. ¹⁸ Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiri-toiri nuġanai sebori-sebori tu ġevaġi-maserito. ¹⁹ Mo hosi ġeri seġuka tu bokari ai ema ġiġuri ai maki. Korana ġiġuri tu mota kavana, ma debari. Mo ġiġuri debari na tarimarima ġevaġa-midigu midigurito-ġoi.

²⁰ Tarimarima oreri, mo vevaġa-midigumidigu dagarari toitoi na asi ġevaġi-maserito tarimari,

tu rogo asi ġevetuġamaġi-kureto ġimari ġauveiri ġerina. Iauka rakavari toma-rakariġori ema asi ġeboġeboġeni e asi ġesegħaqini ema asi ġerakan i kwaivakukuri, golo, silva, auri boraborari, fore e ġau na ġeveirito dagarari toma-rakariġori asi ġevaġa-dokoato. ²¹ Ema ġeri vevaġideba, ġeri meġameġa, ġeri mata-boraġa veiġari, ema ġeri lema ġerina maki asi ġevetuġamaġi-kureto ma asi ġeraka-kureto.

10

Aneru ema toretore fefana maukana misina

¹ Benamo aneru ta, kokore lelevaġi aneruna, guba na ma emariġoto-ġoi aġitaiato. Ĝia tu magube na ġevaġa-dabuġa maukaiato, ma debana iatanai tu kevau ta. Ĝia ġo irħana tu ġaro mamana noġa, ema kwakuna tu karava ġemoren i kavana. ² Gimħai tu toretore fefana maukana misina ta vekeo eġabitaġoato-ġoi. Ĝia kwakuna aroribana tu davarai etoreato, ma kwakuna kaurina tu tanobarai etoreato. ³ Benamo eġabab baregħoto, laion eniarani nai eġabani kavana. Ĝia eġabato murinai, ġaita imaima ruarua (7) garori ġegħuruġato, (ġia ġevaġa-veseato). ⁴ Mo ġaita 7 ġegħuruġato moġeri dori atore-vanaġirito, senaġi guba na ġaro ta eiaġomato, ekirato, “Mani ġaita 7 kara beġe kiraġiri maniġeri tu nokure-toġari, asi bono tore-vanaġiri.”

⁵ Benamo mo aneru, davarai e tanobarai kwakuna etorerito aneruna, aġitaiato, ġimħana aroribana eġabi-vaisiato, guba vanuġana eduġiato, ⁶ benamo tanu-vanaġivanagi Barauna

aranai guruğā-fofori gwağigīna eveiato. Guba ema nuğari ai ġetanuni dagarari mabarari, e tanobara ema nuğari ai ġetanuni dagarari mabarari, ema dağaru-barā ema nuğari ai ġetanuni dagarari mabarari tu ġia na eveirito. Ĝia aranai mai guruğā-fofori gwağigīna eveiato, ekirato, “Taimi varau bekori, Barau asi ma bevağā-nogani. ⁷ Senaġina aneru vağā-imaima ruaruana (7) na ġena dudu befururuani neganai, Barau ġena guruğā vekuretoğari veiğari ema boioğari beğe ġorani, ġena peroveta tarimari ġeri ai ekiraġi-foforirito ilailari ai.”

⁸ Benamo guba na aseġaġiato garona na ma evaġā-guruğaguto, ekirato, “Noiaġo, mo aneru davarai e tanobarai eruğani aneruna, ġimanai toretorefefana maukana evekeo-taġoni, moġea noġabia.” ⁹ Benamo aiaġoto, mo aneru aki-raiato, mani toretorefefana maukana misina nevinigu atato. Benamo ġia na ekiraguto, ekirato, “Noġabia, be noġani-ġosia! Bokamu ai mamina tu gode mamina maki bevanaġioni, senaġi nuğamu tu bevemukini.” ¹⁰ Benamo toretorefefana maukana misina mo aneru ġimana na aġabiato, benamo aġaniato. Aġaniato mamina murugu ai tu gode mamina maki evanaġiato, senaġi aġani-ġosiato nai, nuğagu tu evemukito.

¹¹ Benamo evaġā-guruğaguto, ekirato, “Tanobara beseri ġutuma, garo irauirau tarimari ema ġeri vere baregori o kini ġeri ai karakara beğe ġorani dagarari ma bono peroveta-iaġiri.”

Veaḡa-moḡoni tarimari ruarua

¹ Benamo vaḡa-vetovo ġauna ta, ġitagħitana togoi noġa, eviniguto, benamo ekiraguto, eki-rato, “Noiaġo, Barau ġena Rubu Veāġa ema fata veaġana noa makaia, ema monai toma-rakariġo tarimari vira bono iaviri. ² Senaġi mani Rubu Veāġa nuġanai Iuda tarimari ġeri toma-rakariġo gabuna maġuna murikana, maniġa tu bono iaġuia, asi bono makaia, korana maniġa tu irau bese tarimari ġeri (ġuriġuri gabuna) evinirito, ġia na mai vanuġa baregona veaġana ġue gabana vasivasi ma ruarua (42) nuġari ai beġe fanafana-tariani. ³ Au vaḡa-moġonigu tarimari ruarua seġukā bavinirini, benamo ġaro mabarana 1,260 Barau na bevinirini gurugħari beġe kiraġi-foforirini. Ĝia tu fuse-dabuġari na beġe vedabuġani.”

⁴ Mai vaḡa-moġonigu tauri ruarua tu mo olive ġauri ruarua ema mo lamefa torekauri dagħarari ruarua, tanobara Verena ġoiranai ġeruġani moġeri. ⁵ Bema tarima ta na nevaġa-rakavari betoni nai tu, bokari na karava beġe raka-rosini, benamo inairi beġe vaġa-buataririni. Ĝia ġevaġa-rakavari beġe toni tarimana tu moġesina bemaseni. ⁶ Maiġeri tarima ruarua tu ma seġukari guba beġe kou-ġauani, benamo ġia peroveta gurugħari beġe kiraġirini ġarori ai tu, ġura asi beraguni. Ema ma seġukari maki, nanu beġe kurevoani, rarai beiaġoni, e beġe urani ġarori ai tarimarima vaġa-midgumidiguri dagħarari irauirau tanobarai beġe vaġa-ġorarini.

⁷ Ĝeri vevarifiu beġe vaġa-magoani ġaronai,

vevaḡa-rakava dagarana guri variḡo kwareḡana, (iauka rakavari ġeri dibura), nuḡana na beraka-rosini, benamo ġia bevaḡa-vevaḡirini. Ĝia ġeri seguka bevanaġiani, benamo bevaġi-maserini.

⁸ Benamo ġia tauġaniri tu vanuġa baregona dabarana nuḡanai gena-fitari beġe tanuni. Guruġa veabanaġinai mo vanuġa barana arana ġekiraġiani tu Sodoma ema Aigupito. Ĝia tauru ruarua ġeri Vereġauka tu mo vanuġai ġevaġa-satauroato.

⁹ Ĝaro toitoi ma kwana nuġari ai bese irauirau, doġoro irauirau, garo irauirau, e tanobara irauirau tarimari ġia tauġaniri beġe ġitarini, senaġi guriguriri tu asi beġe urani.

¹⁰ Ĝia ġeri mase dainai tanobarai ġetanuni tarimari tu beġe iakuni, beġe ġani-vegogoni e karori tata ġeri varevare beġe tuġuni; korana tu mai peroveta tarimari ruarua na tanobarai ġetanuni tarimari ġeri ai midigumidigu baregona ġevaġa-ġoraiato.

¹¹ Senaġi mo ġaro toitoi ma kwana ġekorito murinai, maġuri iaġana Barau ġenana ġia tauru ruarua nuġari ai eraka-toġato, benamo ġeruġa-vaisito. Ĝia tauri ruarua ġeġitarito tarimari mabarari ġegħari-rakavato.

¹² Benamo vevaġa-moġoni tauri ruarua na garo baregona ta ġeġeġaqiato, guba na emariġoto, ġia evaġa-guruġarito, ekirato, “Maiġana ġomaraġel!” Benamo tauri ruarua magube ta nuġanai guba ġana ġevaraqeto, ġari inai tarimari ġoirari ai.

¹³ Mo aoa nuġanai moġo tano-iaga baregona eragato, benamo vanuġa baregona taviri gabanana (10) nuġanai tavi sebona tu evaġa-mouato, ma tarima mabarari 7,000 ġemaseto.

Senaġi tarimarima oreri tu ġegari-rakavato, benamo Guba Barauna ġevaġa-raġeato.

¹⁴ Rakava vaġa-ruaruana tu bekori moġa, senaġi vaġa-toitoina tu dori eiaġomani.

Dudu vaġa-imaima ruaruana (7)

¹⁵ Aneru vaġa-imaima ruaruana (7) na ġena dudu efururuato, benamo garo baregori gubai ġegurugħato, ġekirato, “Tanobara basileiana o veġitaġau seġukana tu ġita ġera Vereġauka ema ġena Keriso ġeri basileiائai beiaġo. Be ġia tu bevere-vanaġi vanagħini!” ¹⁶ Benamo veġitaġau tauri gabana ruarua ma vasivasi (24), Barau ġoiranai ġeri teronai ġetanuni tarimari, ġevetuitarito, ġoirrari tano ai, Barau ġetoma-rakariġo vinitato, ¹⁷ ġekirato,

“Vereġauka o, Iaru-korokoro Baraumu, otanuni, e otanuto-ġoi, ġai na ġoi ġatanikiu-vinimuni, korana ġoi ġemu seġuka baregonna oġabiato, e ġemu Basileia o veġitaġau tu varau osinaiato.

¹⁸ Tanobara irauirau beseri ġeburuto, benamo ġoi ġemu baru ma beraġasi. Mase tarimari kota-viniri taimina, ema mo peroveta tauri, ġoi ġemu vetuġunaġi tarimari, e ġemu tarima veaġari, ema ġoi aramu ġematauraian tarimari keiri baregori voiri viniviniri ġarona, ema tanobara ġevaġa-rakavaiato tarimari vaġa-rakavari ġarona beiaġoma.”

¹⁹ Benamo Barau ġena Rubu Veaġa guba nuġanai evekeoto, benamo ġena Kiraġitore

Mauḡana Rubu Veaḡa nuḡanai efoforito aḡitaiato. Benamo kiriku-ḡaita, e garo gururi tari, e guba eguruato guruna baregona, e tano-iaga, ema aisi foreri asikeikeiri ḡeiaḡomato.

12

*Vavine ema ḡugāia kavana dagarana
asikeikeina*

¹ Benamo nuḡa-farevaḡi vetoḡana baregona ta gubai efoforito: Vavine ta, ḡaro na evedabuḡato, ma ḡue tu kwakuna gabureri ai, ema visiḡu gabanana ruarua (12) tu korona noḡa, ḡia debanai ḡevetore-ḡeġeraḡito. ² Ǧia tu ma banina, ma dori eġabito-ḡoi, moġesina nai mero-ḡabi midiguna eġabiato, be eġabato-ḡoi.

³ Benamo nuḡa-farevaḡi vetoḡana ta gubai ma efoforito: Ǧugāia kavana dagarana asikeikeina ta, kakakakana, debana mabarari tu imaima ruarua (7), guduna mabarari tu gabanana (10), ema korona maki ⁷ debana tata iatari sebori-sebori torekau. ⁴ Ǧia ḡiġuna guba visiġuri toiritoiri ġerina sebori-sebori tu tanobara ḡana eiari-firiġorito. Ǧia tu mo vavine, dori eġabito-ḡoi, ḡoiranai eruḡato, beġabini nai, asikauna mero misina bene ḡabia, bene ḡania uranai. ⁵ Vavine eġabito nai tu, mero evaḡa-ḡoraiato. Mo mero na tanobara irauirau beseri mabarari auri togoina na roġo beġori-kaurini ma seġukana baregona ḡesi. Benamo mero emaġurito nai ḡeraga-ḡabi-veġitaiato, Barau e ḡena terona ḡoirana ḡana ḡeġwa-iaġoato. ⁶ Mo vavine tu Barau na ḡena

erovina-toreato gabuna tano fakana ġana egari-iaġoto. Monai beġe nariani e beġe ġubuani ġaro mabarari 1260 nuġari ai.

⁷ Benamo gubai vetari ta egorato: Maikolo ma ġena aneru ġesi ġuġaia kavana dagarana asikeikeina ġeventari-viniato, benamo ġuġaia ma ġena aneru na maki ġia ma ġeventari-vinirito. ⁸ Senaġi ġuġaia kavana dagarana tu asi ekokoreto, naima gubai asi ġeri gabu ai ġevaġa-iagorito. ⁹ Mo ġuġaia kavana dagarana asikeikeina, irau laġani veġata motana, arana “Diabolo” o “Satani”, tano-barra mabarana eġofaiato dagarana, tu ġedorisrojato, e tanobara ġefiu-riġoato. Ĝena aneru mabarari maki ġia ġesi ġefiu-riġorito.

¹⁰ Benamo gubai garo baregona ta eguruġato aseġaġiato, ekirato, “Toma ġita ġera Barau ġena vevaġa-maġuri, e ġena seġuka, e ġena veġitūġau baregona, ema ġena Keriso ġena maoro baregona varau beraġasi. Korana Barau ġoiranai ġita tarikakara boġi-laġani evaġa-daqgarito-ġoi dagarana tu varau beġe fiu-riġoat. ¹¹ Ĝia tu tarikakara na Mamoe Natuna, (ginitaġo mamoen), rarana ema ġia ġena guruġa moġoniri ġevari-fiurito-ġoi, moġerina ġekokoreto, be ġevaġa-ketoato. Ĝeri maġuri asi ġetuġamaġi-kaurito, eiaġoto mo, ġea maseto. ¹² Guba o, ema gubai ġotanuni tarimami o, boġono iaku! Senaġi tanobara e daġaru-bara ġomi tu vetuġami kika! Korana Satani tu ġomi ġemi ai varau bevariġosi, nuġana tu baru na bevonuvonu-raġe, korana ribana, ġia ġena nega tu varau bekubi-rakava.”

¹³ Mo ġuġaia kavana dagarana eribato, ġia

tu tanobarai ġefiu-rīgoato neganai, mero evaġa-ġoraiato vavinena murina na ekureto. ¹⁴ Senaġi mo vavine tu ugava asikeikeina fanena ruarua Barau na eviniato, mo tano fakana, erovinatoreato gabuna, ġana bene rovo-iaġo uranai. Ĝia monai tu laġani toitoi ma kwana beġene naria ema beġene ġubu-tanua ġana. Korana monai tu ġuġaia, mo mota rakavana, na asi ilaila beġabi-karaiani. ¹⁵ Benamo ġuġaia, mota rakavana, bokana na nanu evaġa-ġaru rosiant noġa ġabata kavana. Ĝia eurato mo vavine tu mo ġabata na bene ġaru-kwareġaia etato. ¹⁶ Senaġi tano na mo vavine evaġa-kavaiato, korana tano evekeoto, benamo ġuġaia bokana na eraka-rosito ġarukana mabarana eboġeato. ¹⁷ Benamo ġuġaia kavana dagarana na mo vavine ebaruvini-rakavaiato, benamo eiaġoto, mo vavine besena, Barau ġena taravatu gurugari ġekorana-iaġirito-ġoi ema Iesu ġena vevarifiu gurugari ġevaġa-moġonirito-ġoi tarimari mabarari evetari-vinirito. ¹⁸ Benamo ġuġaia tu kone ai ea ruġato.

13

Davara na vevaġa-rakava dagarana ebere-rosito, moġa tu Keriso ġofaġofana

¹ Benamo au na vevaġa-rakava dagarana ta aġitaiato, daġaru-barra na eraka-raġeto. Ĝia guduna mabarari tu gabanana (10), e debana mabarari tu imaima ruarua (7). Korona mabarari tu gabanana (10). Moġeri korona tu ġia guduna tata ġeri ai, ma debana tata ġeri ai tu Barau vaġa-rakavana arana. ² Mo vevaġa-rakava dagarana

aǵitaiato, moǵa ǵitaǵitana tu lepadi noǵa, (lepadi tu taiga noǵa), a kwakuna tu bea kwakuri kavana, ema bokana tu laion bokari kavana. Benamo ǵuǵaia kavana dagarana asikeikeina tauǵena ǵena seǵuka, ǵena terona, ema ǵena maoro eǵabirito, mo vevaǵa-rakava dagarana eviniato. ³ Vevaǵa-rakava dagarana debana tai tu giri baregona ta, ǵevaǵi-maseato girina, senaǵi mo manuǵa baregona tu enamoto. Tanobara tarimari mabarana mo vevaǵa-rakava dagarana ǵenai nuǵari ǵefarevaǵi-rakavato, benamo ǵia murinai ǵerakato. ⁴ Tarimarima mabarari na ǵuǵaia ǵetoma-rakariǵo viniato, korana ǵia ǵena seǵuka tu mo vevaǵa-rakava dagarana eviniato. Ema vevaǵa-rakava dagarana maki ǵetoma-rakariǵo viniato, ǵevedanáǵito, ǵekirato, “Dei tu mai vevaǵa-rakava dagarana kavana? Dei na ǵia bevetari-viniani riba?”

⁵ Mo vevaǵa-rakava dagarana tu maoro eviniato tu, veiavi guruǵari ema Barau vaǵa-rakavana guruǵari bene kiraǵiri ǵana, ema ǵue gabana vasivasi ma ruarua (42) nuǵari ai ǵena maoro bene ǵauvei-iáǵiri. ⁶ Benamo muruna ekeoato, ma Barau vaǵa-rakavana guruǵari ekiraǵi-matamato; Barau arana ema ǵena tanu gabuna ekira-rakavarito, ema gubai ǵetanuni tarimari mabarari evaǵa-rakavarito. ⁷ E maoro eviniato, Barau ǵena veaǵa tarimari bene vetari-viniri nuǵanai bene kokore, be ǵia bene vaǵa-darereri ǵana. Ema seǵuka eviniato, doǵoro mabarari, e bese mabarari, e garo mabarari, ema tanobara mabarari bene ǵori-kauri ǵana. ⁸ Tanobarai ǵetanuni tarimari mabarari na ǵia

beğe toma-rakariño viniani. Maiğeri tarima tu, Barau na tanobara roğosi bere veia veğata, arari mo Mamoe Natuna, gevagiato dagarana, ġena mağuri bukanai arari asi etorerito taramari.

⁹ Ma seğana tarimana tu bene seğägi. ¹⁰ Barau beurani dibura numanai begene baru-taria betoni tarimana tu, dibura numanai beğe barutariani veğata. Barau beurani vetari bağana na begene vağı-masea betoni tarimana tu, vetari bağana na beğe vağı-maseani. Maiğeri guruğna na Barau ġena tarima veağari evağaguruğarini, begene vevağ-a-gwağigī, ema ma ġeri vetuğamagikau ġesi begene tanu.

Vevağ-a-rakava dagarana vağ-a-ruaruana, moğ-a tu peroveta tarimana ġofağofana

¹¹ Moğ-a murinai au na vevağ-a-rakava dagarana ta ma ağıtaiato, tano na everağ-a-rağeto. Ĝia guduna tu ruarua, Mamoe Natuna guduna kavana, ema ġia tu ġuğai a kavana eguruğato-ġoi. ¹² Ĝia na vevağ-a-rakava dagarana giniguinen moğ-a aranai ġena maoro e seğuka mabarari eğauvei-iağirito. Ma ġia na tanobara tanu-iağina tarimari mabarari elau-nağirito, mo vevağ-a-rakava dagarana giniguinen, debana giri baregona, gevagi-maseato girina, manuğana en-amoto dagarana, begene toma-rakariño vinia etato. ¹³ Mai vevağ-a-rakava dagarana vağ-a-ruaruana mainana veığa boruri baregori ema vetoğ-a irauri tari eveirito-ġoi. Ta tu, ġia na tarimarima mabarari ġoirari ġutuğutunai karava guba na evağ-a-mariñoato. ¹⁴ Ĝia tu vetoğ-a

boruri kotari eviniato, mo vevaāga-rakava dagarana giniguinena ġoiranai eveirito, tanobarai ġetanuni tarimari eġofa-darererito. Ma ekirarito, mo vetari baġana na ġevaāga-beroato, ma toma roġo emaġuri-tanuni vevaāga-rakava dagarana, moġa gubakauna ġana tu vetoġana dagarana o laulauna ta beġene veia, benamo ġene vaġa-rūga-vaisia etato. ¹⁵ Mo vevaāga-rakava dagarana vaġa-ruaruana tu seġuka eviniato, vevaāga-rakava dagarana laulauna giniguinena moġa iaġa bene vinia, be bene guruġa, ema mo vevaāga-rakava dagarana laulauna asi ġeurani toma-rakariġo-vinina tarimari mabarari bene vaġi-maseri ġana.

¹⁶ Benamo tarimarima mabarari, misiri e baregori, ma ġeri farefare ġutuma tarimari e asi ġeri farefare tarimari, tuġu-rakaorakao tarimari e fakai ġetanuni o dia tuġu-rakaorakao tarimari, etuġu-naġināġirito vetoġa o maka ta ġimari aroribari ai o bakuri ai beġene ġabia etato. ¹⁷ Moġesi beġene vei, be tarima ta dagara ta asi bene voivoi-kava o asi bene voivoi-iaġi-kavaia, senaġi mo vevaāga-rakava dagarana giniguinena ġena vetoġa o maka, mai tu ġia arana o arana eruġa-boroġiato numerana, ġenai tarimana ġereġana moġo dagara bene voi e bene ġwa-voivoi. ¹⁸ Iaunega tu maiġa: Nuġa-mama o tuġamaj-ġi-faka tarimana na mo vevaāga-rakava dagarana numerana bene vaġa-gaua, korana mo numera tu tarima ta numerana. Numerana tu maiġa: 666.

*Ginitaō mamoena na evoi-vagirito tarimari
geri mari*

¹ Benamo abogeto tu, Mamoe Natuna ġoiragu ai aġitaiato, Siona Ĝoronai eruġa-taġoto-ġoi, ema ġia sevinai tarimarima 144,000 ġeruġa-taġoto-ġoi. Bakuri ai tu ġia arana ema Tamana arana ġegetoreto. ² Benamo guba na garo ta ġaruka vovoka ġegħaru-gwadani gururi ema guba eguruani guruna noġa aseġaġirito. Mo guru tu noġamo hap ġelauni tarimari na ġeri hap ġelaurito-ġoi gururi kavana. ³ Ĝia tu mo terona, e maġuri dagarari vasivasi (4), ema veġitaġau tarimari baregori ġoġirari ai mari variġuna ta ġemariato. Tarima ta na mo mari moġa marimarina tu asi bedoġariani riba, senaġi mo tanobara na ginitaō mamoena na evoi-vagirito tarimari 144,000 ġereġari na moġo. ⁴ Mai tarima maiġeri tu vavine ġesi asi ġekimato o asi ġeveġura-vanaġito, be asi ġemiroto, ġia tu tauġeri ġevenaumato, be ġia tu namo vedaura. Ĝia tu Mamoe Natuna aīgħana aīgħana eiaġoni nai, murina na ġerakani. Tarimarima vekaravari ai ġia tu Barau na evoirito, ma Barau ema Mamoe Natuna ġeri tarimarima giniguineri ai ġeiaġoto. ⁵ Mururi na ġofaġofa guruġana ta asi ġekiraġiato, ġia ġeri ai rakava misina ta maki asiġina ġinavagi.

Aneru toitoi

⁶ Benamo au na aneru ta maia guba e tano fakari na erovoto-ġoi aġitaiato. Ĝia ġenai tu Vari Namona, betanu-vanaġi vanaqini varina. Ĝia na mai Vari Namona tu tanobara mabarari, e doġoro mabarari, e garo mabarari, ema bese

mabarari tanobarai ġetanuni ġeri beġene vari-flua ġana. ⁷ Eguruġa-fararato, ekirato, “Barau garina boġono vei ema Barau boġono vaġa-raġea! Korana tu ġia ġena vevaġa-kota aoana tu varau beraġasi. Guba, e tanobara, e daġaru-barā, ema nanu eġaruani gaburi eveirito Barauna boġono toma-rakariġo vinia.”

⁸ Aneru vaġa-ruaruana murina na eiaġomato, benamo ekirato, “Beketo, Babulona baregona varau beketo. Ĝia na tanobara irauirau beseri mabarari ġia ġena veġura-vanaġi wainina gwaġigina evaġa-niurito.”

⁹ Ma aneru vaġa-toitoina ġia murina na eiaġomato, benamo eguruġa-fararato, ekirato, “Bema tarima ta na mo vevaġa-rakava dagarana ema iouiouna dagarana betoma-rakariġo viniani, ema ġena maka bakunai o ġimanai beġabi-raġeani tu, ¹⁰ ġia maki Barau ġena baru baregona wainina beniuani. Mo baru baregona wainina gwaġigina moġa tu mabarana Barau ġena baru kapusina nuġanai ebubu-ġuraiato. Ĝia tu aneru veaġari ema Mamoe Natuna ġoirari ai karava morena e salfa nuġanai bemidigu-midiguni. ¹¹ Ĝia mo karava moreri nuġanai beġe midigu-midiguni goġuna tu beraġe-vanaġi vanagħini asi magona. Ma vevaġa-rakava dagarana ema ġia vetoġħana o laulauna dagarana beġe toma-rakariġo viniani tarimari o ġia arana makana beġe ġabiani tarimari tu, boġi-laġani asi beġe iaġaraġini.”

¹² Mainana Barau ġena tarimarima veaġari, Barau ġena taravatu ġekorana-iaġiani ema Iesu ġenai ġevetuġħamaġikauni tarimari, evaġa-

guruğarini, beğene vevağ-a-gwağıgi ema beğene kokore.

¹³ Benamo guba na garo ta ma aseğägiato, eki-rato, “Maigeri guruğ-a notoreri: Maitoma beiağoni tu, Vereğauka ğena mağuri nuğanai ğetanuni tarimari beğe maseni tu beğene iaku.” Iauka Veağ-a evağ-a-veseto, “Oi, ğia tu ğeri ğauvei e vekwarağı na beğe iağarağını, korana tu ğeri veiğ-a namori ğia ğesi beğe iağ-o-sebonani.” (Moğ-a anina tu, ğeri vekwarağı voina namona beğe doğariani veğata).

Tanobarai kwakwa ğarona

¹⁴ Benamo aboğe-iağoto, magube kurokurona ta ağıtaıato, ma mo magube kurokurona iatanai tu Tarimarma Natuna noğ-a tarimana etanuto. Ğia debanai tu golo koronana ta, ma ğimanai tu bağ-a ğegevana masikona ta. ¹⁵ Benamo aneru ta maia Rubu Veağ-a na ema raka-rosito, bena magube kurokurona iatanai etanuto tarimana ekea-farara viniato, ekirato, “Ğemu bağ-a ğegevana noğabi-vaisia, benamo ğaniğani dagarari nobasi-vağıri! Korana kwakwa o basibasi ğarona varau berağası, tanobarai ğaniğani tu beğe mağe-ğosi.” ¹⁶ Benamo mo magube iatanai etanuto tarimana ğena bağ-a ğegevana tanobara iatana na edave-vanağıato, benamo tanobara ğaniğanına ebasi-vağıato, eğabiato.

¹⁷ Aneru ta maia guba na Rubu Veağ-a nuğana na ema raka-rosito. Ğia maki ğimanai tu bağ-a ğegevana masikona ta. ¹⁸ Aneru ta maia fata veağana na eiağomato. Ğia tu karava eğitağauato-ğoi aneruna. Ğia eiağomato, benamo

bağā ġeġevana masikona eġabiato aneruna ekeafarara viniato, ekirato, “Ġemu bağā ġeġevana masikona noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe. ¹⁹ Benamo mo aneru na ġena bağā ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea bubu-toġarito. Mo vine ġwari ġefanarini gabuna moġa, mo tu Barau ġena baru ekiraġjani gabuna. ²⁰ Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

15

Aneru imaima ruarua (7) ġeri ai vevaġa-midigumidigu dagarari rakavari 7

¹ Benamo gubai vetoġa baregona ta, nuġafarevaġi dagarana aġitaiato: Aneru 7 aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-kori ginikauani.

² Ma davara ta veġia kavana ma karavana aġitaiato. Mo davara sevinai tu mo tarimarima, vevaġa-rakava dagarana ema ġia laulauna

dagarana ema ġia arana ekiraġiani numerana
 ġevaġa-ketorito tarimari, ġeruġa taġoto-ġoi
 aġitarito. Ġia ġimari ai tu Barau na evinirito
 hapiri ġeġabi-taġorito-ġoi,³ ma Barau ġena
 vetuġunaġi tarimana, Mose, ġena mari ema
 Mamoe Natuna ġena mari ġemariato-ġoi,
 “Vereġauka o, ġoi tu
 Iaru-korokoro Barauna,
 ġemu ġauvei tu barego,
 asi tau vaġa-ilailana
 ema namo vedaura. Ĝuru mabarari ġeri Vere o,
 ġoi ġemu dabara tu iobukaiobuka ema moġoni
 veġata.

⁴ Vereġauka o, deikara na ġoi asi begari-vinimuni,
 ma ġoi aramu asi bevaġa-raġeani?
 Korana tu ġoi moġo ġereġamu veaġa.
 Tanobara mabarari tarimari beġe iaġomani,
 benamo ġoi beġema toma-rakariġo vinimuni.
 Korana tu ġemu veiġa iobukaiobukari varau
 beġema fofori.”

⁵ Maiġa murinai au aboġe-iaġoto, benamo
 gubai Rubu Veaġa, mo tu Barau na ġena guruġa
 moġoniri evaġa-foforirini farai numana veaġana,
 evekeoto aġitaiato. ⁶ Mo aneru imaima ruarua
 (7), ġeri ai tu tarimarima vaġa-midigidiguri
 dagarari rakavari; farai numana veaġana na
 ġeraka-rosito, dabuġa gwaġiġiri namori ema
 vegia-veġiari na ġevedabuġato, ema kobari ai tu
 golo beletari ġetore-ġeġeraġirito. ⁷ Benamo mo
 maġuri dagarari vasivasi vekaravari ai ta na mo
 aneru 7 golo diġuri 7 evinirito. Mo golo diġuri tu

tanu-vanaǵivanaǵi Barauna ǵena baru na evaǵa-vonu fokafokarito. ⁸ Benamo mo Rubu Veaǵa tu Barau marevana goǵuna ema seǵukana goǵuna na evaǵa-vonuato. Tarima ta Rubu Veaǵa nuǵanai asi roǵo beraka-toǵani riba, beiaǵoni mo, tarimaria vaǵa-midigu-midiguri dagarari rakavari 7 beǵe korini vau.

16

Barau ǵena baru diǵu imaima ruarua (7) nuǵari ai

¹ Benamo garo baregona ta Rubu Veaǵa nuǵana na eiaǵomato aseǵaǵiato. Mo garo na tu aneru 7 evaǵa-guruǵarito, ekirato, “Goiágo, Barau ǵena baru na evaǵa-vonurito diǵuri 7 manígeri tanobara iatanai ǵoa bubu-firiǵori.”

² Aneru giniguinena eiaǵoto, ǵena diǵu tanobara iatanai ea bubu-kauato. Benamo manuǵa ǵitaǵitari rakava kwaikwairi ma midiguri maki asikeikeiri vevaǵa-rakava dagarana ǵena vetoǵa o maka ǵeǵabiato ema ǵia iouiouna dagarana ǵetoma-rakariǵo viniato tarimari na ǵeǵoitagaǵorito.

³ Aneru vaǵa-ruaruana ǵena diǵu tu davara ebubu-riǵoato. Benamo mo davara tu mase tarimana rarana kavana eveito, ma nuǵanai maǵuri ǵetanuni dagarari mabarari ǵemaseto.

⁴ Aneru vaǵa-toitoina ǵena diǵu tu ǵarukai ema nanu eǵaruani gaburi ai ebubuato, benamo rarai ǵeǵaǵoto. ⁵ Benamo nanu eǵita-ǵauani aneruna garona aseǵaǵiato, ekirato, “Veaǵa Baraumu,

ḡoi tu tovotovonai otanuto-ḡoi,
ema initoma maki otanuni.

Ḡoi ḡemu kota-vini ḡauveina tanobara tarimari
ḡeri ai maiḡesina oveiani tu maoro korikori
moḡo.

6 Korana ḡia na ḡoi ḡemu tarimarima veaḡari ema
peroveta tarimari rarari ḡevaḡa-riḡorito.

Moḡesina naima ḡeri veiḡa lorinai,
be rara boviniri beḡe niu.”

7 Benamo Barau ḡena fata veaḡana na garo ta
eiaḡomato aseḡagiato, ekirato,

“Vereḡauka o, ḡoi tu moḡoni veḡata Iaru-korokoro
Barauna,

ḡemu kota-vini ḡauveiri tu dabara moḡoninai ema
maoronai oveiani.”

8 Aneru vaḡa-vasivasina ḡena diḡu tu ḡaro
iatanai ebubu-kauato. Benamo ḡaro seḡuka evini-
ato, tarimarima karava na bene ḡarari ḡana.

9 Benamo mo ḡaro seḡukana gugurana bareg-
ona na tarimarima eḡararito. Ma monana
tarimarima tu asi ḡevetuḡamaḡi-kureto, benamo
Barau asi ḡevaḡa-raḡeato, ne ḡia na tu Barau
arana ḡevaḡa-rakavaiato. Barau tu ma ḡena
maoro baregona maiḡeri midigumidigu dagarari
rakavari bevaḡa-ḡorarini e asi bevaḡa-ḡorarini.

10 Aneru vaḡa-imaimana ḡena diḡu tu vevaḡa-
rakava dagarana ḡena terona iatanai ebubu-
kauato, benamo ḡena veḡitaḡau gabuna tu
emukuna-furufuruto. Benamo tarimarima
midigumidigu baregona na eḡabirito, ma meari
ḡekafu-taririto. **11** Mo midigumidigu ema manuḡa

dairi ai, ġia na gubai etanuni Barauna ġevaġa-rakavaiato. A ġia tu asi ġeūrato ġeri veiġa rakavari ġerina beġene vetuġamaġi-kure.

¹² Aneru vaġa-imaima sebonana (6) ġena diġu tu Eufrate ġarukana baregona nuġanai ebubuġuraiato. Benamo mo ġaruka baregona ero-roto, ġaro eraġeni rekena na kini (ma ġeri vettari doġorori ġesi) beġe iaġomani, moġeri ġeri dabara evaġa-fakaiato. ¹³ Moġa murinai iauka rakavari toitoi farakeġo noġa moġo aġitarito. Ta tu dagara ta ġuġaia kavana, (mai tu Satani), bokana na ema raka-rosito, ta tu vevaġa-rakava dagarana, (mai tu Keriso ġofaġofana), bokana na ema raka-rosito, ma ta tu peroveta ġofaġofa tarimana bokana na ema raka-rosito. ¹⁴ Mo iauka moġeri tu demoni iaukari, ġia na veteġa irauirauri ġeveirito-ġoi, ema ġeiāġoto tanobara mabarana kiniri ġeri ai, beġenea vaġa-vegogori, be Iaru-korokoro Barauna ġena ġaro baregonai tu Barau beġene vaġa-vevaġia ġana.

¹⁵ “Noseġaġi! Au tu lema tarimari kavana baġomani! Bevaġa-noga-taġoni ema ġena dabuġa kefinai bevei-taġorini tarimana tu bene iaku. Korana ġia tu kefina kori asi beiaġoni, benamo ġutuma-barra nuġanai asi bemaikakaiani.”

¹⁶ Benamo demoni iaukari toitoi na kini mabarari ġeġori-vegogorito gabu tai, Heberu garori ai mo gabu arana tu Amagedon.

¹⁷ Aneru vaġa-imaima ruaruana (7) ġena diġu tu guba fakanai ebubuato, benamo Rubu Veāġa nuġana na garo baregona ta terona na eiaġomato, ekirato, “Varau bekori!” ¹⁸ Benamo kiriku eraġato, e garo gururi tari ġeraġeto, e guba eguruato,

ema tano-iaga baregona eragato. Tarimarima tanobarai ġetanu-guineto, monana beiaġoma mo initoma moġesi tano-iaga ta tu asi egorato. Moġa tu tano-iaga barego lelevaġina veġata. ¹⁹ Benamo vanuġa baregona evetavito, tavi toitoi ġeventoreto, ema tanobara mabarari vanuġari maki ġeġwa-kafu kafurito. Barau na vanuġa baregona Babulona ma etuġamaġi-ġenogħoiato, benamo Barau ġena baru ema nuġa-ġirimaġirima wainina na evaġa-vonu fokafokaiato kapusina eviniato, bene niua ġana. ²⁰ Benamo motumotu mabarari ġeraga-rekwarekwato ema ġoro maki ġerekwarekwato, be asiġina. ²¹ Ma guba na aisi, fore noġa asikeikeiri, ġeri meto tu pauna sināu sebona (100) kavana, tata tarimarima iatari ai ġekketokauto. Benamo mo tarimarima na Barau guruġa rakavari ġeviniato-ġoi, korana mo aisi, fore noġa asikeikeiri, iatari ai ġekketokauto-ġoi dainai. Korana mo vevaġa-midigumidigu dagarana rakavana moġa tu rakava kwaikwaina.

17

Babulona - veġura-vanaġi vavinena baregona

¹ Benamo mo diġu imaima ruarua (7) ġeġabi-taġorito-ġoi aneruri fakari ai ta tu au rekegu ġana eiaġomato, benamo au ema vaġa-guruġaguto, ekirato, “Noiāġoma, be veġura-vanaġi vavinena baregona ġena veġura-vanaġi voina metona beġabiani metona navaġa-ġitamu. Ĝia tu nanu vovoka iatari ai etanuni. ² Tanobarai ġetanuni vereri baregori o kiniri mabarari tu ġia ġesi ġeveġura-vanaġito. Ema tanobarai ġetanuni

tarimari maki ġia ġena veġura-vanaġi wainina na ġeniu-babobaboto.”

³ Benamo Iauka Veāga na eborogiguto, aneru ta na eġwa-rakaguto, tano fakana ġana eġwa-iäġoguto. Monai vavine ta aġitaiato, vevaġa-rakava dagarana kakakakana ta iatanai etanu-taġoto-ġoi. Mo vevaġa-rakava dagarana tauġanina tu Barau vaġa-rakavana arari ġevaġa-vonuato. Ĝia debana mabarana imaima ruarua (7), ema guduna tu gabanana (10). ⁴ Mo vavine tu dabuġa kakakakari ema koturi kakakakari o pepolori namo ved Aureari eriġoto, ema golo e fore nauġanaugari ema aġeva ma marevari na everato. Ĝimanai tu golo kapusina ta eġabiato. Mo golo kapusina tu veiġa rakava kwaikwairi ema ġena veġura-vanaġi mirori na evonufokafokato. ⁵ Ĝia bakunai tu ara ta ġeberaiato, anina maki vekuretoġa, maiġesi ġetoreato, “Babulona barana, veġura-vanaġi sinari ema tanobarai veiġa rakava kwaikwairi mabarari sinari.” ⁶ Benamo au na mo vavine aġitaiato, Barau ġena tarimarima veaġari, ġevaġi-maserito tarimari, rarari eniurito, be eniu-babobaboto. Mo tu Iesu ġevaġa-moġoniato-ġoi nai, ġevaġi-maserito tarimari rarari. Au na ġia aġitaiato nai, aġaba-rakavato.

⁷ Benamo mo aneru na ekiraguto, ekirato, “Goi tu kara dainai oġaba-rakavani? Mani vavine maniġa varina vekuretoġana ema mani vevaġa-rakava dagarana iatanai beraġe maniġea, mani debana 7 ma ġena gudu 10, varina vekuretoġari tu nakiravara-ginikaumu. ⁸ Mo vevaġa-rakava

dagarana boḡitaia, moḡa tu guinenai etanuto-ḡoi, ma ḡia toma tu asi tauna. Ġia tu tano gabigabina guri variḡo kwareḡana na bema raka-rosini, benamo beiağoni gabuna rakava kwaikwaina, midigumidigu baregona bea ḡabiani. Tanobarai ġetanuni tarimari, Barau na tanobara eveiato monana veḡata arari maḡuri bukanai asi etorerito tarimari, na mo vevaḡa-rakava dagarana ġeġitaiato nai tu, nuḡari ġefarevaḡi-rakavato. Korana ḡia tovotovonai tu etanuto-ḡoi, ma toma tu asi tauna, senaḡi ḡia tu ma beiağomani.

⁹ Iaunega tarimana na maiḡa bene tuḡamāḡi-fakaia. Mo deba 7 tu mo vavine etanukauni ḡorori 7. ¹⁰ Ma ḡia aniri ta maki vere baregori o kini 7. Vere barari imaima tu ġeketoto, sebona tu roḡo eruḡa-taḡoni, ma ta tu roḡosi bene iaḡoma. A ḡia beiağomani tu, mai tanobarai asi betanu-maukani. ¹¹ Mo vevaḡa-rakava dagarana guinenai etanuto-ḡoi, ma initoma ḡia tu asi tauna, maniḡa tu kini vaḡa-imaima toitoina (8). Ġia tu mani vere baregori o kini 7 karori ta, ma ḡia tu beiağoni gabu rakava kwaikwaina midigumidigu barego bea ḡaniani.

¹² Mo gudu 10 oğitarito, moğeri mo tu kini 10. Ġia tauri 10 tu kini dagina ema beġe ġita-ḡaurini tano-barari roḡosi beġene ḡabiri. Senaḡina ḡia tu aoa sebona mo vevaḡa-rakava dagarana ġesi kini kavana veġitaḡau maorona baregona beġe ḡabiani. ¹³ Ġia ġeri tuḡamaḡi tu sebona moḡo, ema ġeri seġuka e maoro baregona tu mai vevaḡa-rakava dagarana beġe viniani. ¹⁴ Ġia

na Mamoe Natuna beğe vetari-viniani, senaḡi Mamoe Natuna na bevaḡa-ketorini, korana ġia tu vere mabarari ġeri Vere, ema kini mabarari ġeri Kini. Ema ekearito e eġabi-virīgiritu ema ma vetuḡa-maġikauri ġesi ġia murinai ġerakani tarimari maki ġia ġesi beğe kokoreni.”

¹⁵ Benamo mo aneru na ekiraguto, ekirato, “Mo veġura-vanaġi vavinena etanu-taġoni nnuri bogitari, moġeri tu tanobara beseri, tarima ġutuma gorogoro, tanobara irauirau tarimari, ema garo irauirau tarimari bogitari. ¹⁶ Mo vevaḡa-rakava dagarana ema mo gudu 10 bogitari dagarari, mani veġura-vanaġi vavinena tu beğe iau-rakavaian. Ġia na asi ġena farefare ai beğe vaḡa-iaġoani, e dabuġana ġenana beğe fuki-vaġirini, tauġanina kori beğe vaḡa-rakaian; viriġona beğe ġaniani ema karavai beğe gaburageani. ¹⁷ Korana Barau na maniġeri kini nuġari ai evaġa-urato, ġia ġena ura beğene veia etato. Moġesina naima ġia maki ġeurato nai, ġeri seġuka mo vevaġa-rakava dagarana beğene vinia, be bene veġorikau, bene iaġo mo, Barau ġena gurugħa mabarari beğenea ġuġuru. ¹⁸ Ema mo boġitaia vavinena tu vanuġa baregona. Ġia na tanobara vereri o kiniri mabarari eġori-kaurini.”

18

Babulona beketoni

¹ Maiġa murinai aneru ta ma ġena seġuka baregona ġesi guba na emariġoto aġitaiato. Ġia

marevana mamana na tanobara emama-vaḡa-ḡauato. ² Benamo tuḡana maki asi ekoḡoto, ekirato,

“Beketo! Vanuḡa baregona Babulona tu beketo!

Ģia tu demoni ġeri tanu gabunai beiaġo, e iauka rakavari ema iauka mirori, e manu rakava kwaikwairi ġeri tanutaġo gabunai beiaġo.

³ Korana tu bese mabarari na ġena wain ġeniuato nai ġevei-babobaboto; mo wain tu ġena veġura-vanaġi ġauveiri.

Tanobarai ġetanuni kiniri mabarari tu ġia ġesi ġeveġura-vanaġito,

ema tanobarai dagara ġeġwa-voivoirini tarimari maki ġia ġena farefare namori ġerina farefare vovoka tarimari ai ġeiaġoto.”

⁴ Moġa murinai tu guba na garo ta eiaġomato ma aseġaġiato, ekirato,

“Gegu tarima mabarami,

mai vanuḡa baregona ġenana ġoma raka-rosi.

Be ġia ġena vei-rakava veiġari asi boġono veiri, ġia na vevaġa-midigumidigu dagarari rakavari beġabirini dagarari ġomi na asi boġono ġabiri.

⁵ Korana ġia ġena vei-rakava tu iatai-iatai bevesenu-Senukau, bevaraġe mo, guba vanuġana maki bea doġaria.

Senaġi Barau na ġena veiġa, asi maorori dagarari, etuġamaġi-taġorini, asi etuġa-rekwarini.

⁶ Ģia na ġomi evinimito ilailana ma boġono vini-viġa-voia.

Ġena veiġa voina ilailana moġa boġono viġa-ruaia, benamo boġono vinia.

Niuniu wainina kapusi sebona ġomi evinimoto nai tu, ġena kapusi korikori ai niuniu wainina moġa nuġanai ta maia boġono bubu-ġuraia, boġono vaġa-ruaia, benamo voina boġono vinia.

⁷ Tauġena eveġabi-varaġeto ema eġani-namoto-ġoi ema etanu-namoto-ġoi ilailanai, midigumidigu boġono vinia ema boġono vaġa-taġitaġia.

Ġia nuġanai tu eveiavini, ekirani,
 ‘Au tu kwin o vere vavinena kavana atanuni.
 Au tu dia vabu ema asiġina ġinavaġi bataġi-vanoro vanoroni.’

⁸ Moġesina naima ġia tu ġaro sebona nuġanai moġo midigumidigu irauirau na beġe vaġa-ketoani, mo tu mase, taġi-vanorovanoro, ema doġe ġenai beġe raġasini.

Ma ġia tu karava na beġaraiani.
 Korana ġia ġeri rakava voina beviniani Barauna tu Barau Vereġauka,
 ma ġia tu ma seġukana.”

⁹ Tanobara kiniri, ġia ġesi veġura-vanaġi veiġari ġeveito ema ġia ġesi ġeġani-namoto-ġoi e ġetanu-namoto-ġoi kiniri, na ġia beġaraiani goġuna beġe ġitaiani nai tu, taġina beġe veini, ema beġe taġi-vanoroani. ¹⁰ Ĝia ġena midigumidigu beġe ġitaiani, moġa garina na manaġai beġe ruġani, benamo beġe taġi-guruġani, beġe kirani, “Vetuġamu! Siti baregona vetuġamu kekei!
 Babulona o, seġuka rakava sitina!
 Goi tu aoa sebona nuġanai moġo ġemu rakava voina metona boġabia!”

11 Tanobarai dagara ġevoivoi-iaġirini tarimari beġe taġini ema beġe taġi-vanoroani, korana ġeri voivoi-iaġi farefarer tu asi voivoiri tarimana ta.

12 Mo tu ġeri golo, e silva, e fore namo vedau-reari voiri barego foreri, ema aġeva marevari asi-gadara dagarari; dabuġa namori gwaġigiri, e dabuġa kota kakakakari o pepolori, e dabuġa silikari, ema dabuġa kakakakari; ma bonari ġauri, e elefani doğari na ġeveirini dagarari irauirauri, e ġau voiri barego ġauri na ġeveirito dagarari, e auri boraborari e auri namori ema mabolo na ġeveirito dagarari; **13** ġaniġani mamiri vaġ-namori muramurana arana sinamon, e ma bonari muramurari, e goġu ma bonana eveiani muramurana, e bonana namona muramurana arana muro, e tauġani ai ġedauani muramurana arana frenkinsens; vine nanuna, e olive diġana, farao ema widi, boromakau ema mamoe, hosi ema kariota, ema tarimarima maki. **14** Beġe kirani, “Ġau ġwaġwana bono ġabia otato-ġoi uradikana oveito-ġoi dagarana tu ġemuna beveġita. Ĝemu farefare vovoka ema ġemu mareva mabarari beġe rekwarakwa, asi bodoġari-ġenogoirini maia!”

15 Dagara ġegħwa-voivoini tarimari na maiġeri dagara ġevoivoi-iaġirito ema ġia ġenana farefare vovoka ġegoitaġoto, moġeri tu manaġai beġea ruġani, mo midigumidigu ġia na beġabiani moġa garina. Ĝia tu beġe taġi-rakava rakavani ema beġe taġi-vanoroni, **16** ema beġe taġi-guruġa guruġani, beġe kirani,

“Vetuġamu! Vanuġa baregona, vetuġamu kekei!
Dabuġa namori gwaġigiri, e dabuġa kota
kakakakari o pepolori, ema kakakakari

na ovedabuğato;
 golo kimorekimoreri, e fore namo vedaureari,
 ema gudugudu marevari asi-gadarana
 oveiato-goi.

¹⁷ Aoa sebona nuğanai moğō ġemu farefare vovoka tabutabu mabarari benamo beğema kori-ketovağı!”

Bouti baregori ġeġwa-ragarini tarimari mabarari, e bouti ai davara na ġeragani tarimari mabarari, e bouti ai ġeġauveini tarimari, ema davara mağaniri ma dagara tari ġerina ġerigarī ġeġoitağoni tarimari mabarari manağai ġea ruğato. ¹⁸ Benamo eġaraiato goġuna ġeġitaiato nai tu, maiġesina ġekirato, ‘Mai vanuġa baregona tu irau veğata, siti ta maiġesina kavana tu asi etanuto-goi.’ ¹⁹ Benamo tano-kauri debari ai ġebubukauto, ġetağıto e ġetağı-vanoro vanoroto, ġekirato,

“Vetuğamu kekei! Vanuġa baregona vetuğamu kekei!

Ma ġeri bouti davarai tarimari tu ġia ġena tağā ġenana farefare vovoka ġeġoitağoto, ene?

Aoa sebona nuğanai ġia tu asi ġena farefare tai moğō beiağo.

²⁰ Guba vanuğana o, ġia ġena keto iakuna ġovei. Barau ġena tarima veaġami, e apostolo tarimami, ema peroveta tarimami, ġoiaku ġoverere; korana ġomi veiġa rakavari evei-vinimoto dainai, Barau na ġena rakava voina bevinia.”

²¹ Benamo aneru kokore rakavana ta na fore ta widi ġegiro-iaġirini diġuna baregona ta kavana

eğabiato. Mo fore-diguna moğā eğabi-vaisiato, benamo davarai efiu-reiato, benamo ekirato, “Vanuğā baregonā Babulona tu maiğesi ma baruri ġesi beğe fiu-tariani, benamo berekwarekwa-moğovağini, asi ġitağitanai ma beiağoni.

²² Hap ġelauni ma mari ġeġabini gururi, e ivirikou ġefururuni ema dudu ġefururuni gururi ġoi ġemu maninai asi ma beğe seğagi-ġenoġoirini.

Ġauwei namori ma ribari tarimari ġoi nuğamu ai asi ma beğe tanu-ġenoġoini.

Widi ġegiro-iaġirini foreri gururi maki maninai asi ma beğe seğagi-ġenoġoirini.

²³ Maninai lamefa mamari asi ma beğe ġara-ġenoġoini.

Veġaraġo variġu tauna e vavinena garona ta maki maninai asi ma beğe seğagi-ġenoġoiani.

Ġoina dagara voivoi-iaġiri tarimari mai tanobara nuğanai ġia tu tarima baregori.

Ġoi ġemu meġameġa tovoġari na tanobara irauiħrau mabarari oġori-darererito.

²⁴ Peroveta tarimari e Barau ġena tarimarima veaġari ġevaġirito rarari, ema tanobara iatanai tarimarima ġevaġirito rarari mabarari maki Babulona vanuğā baregonā nuğanai ġea ġoitaġorito.”

¹ Mōga murinai tu nōga mōgo tarimarima
asisebo-asisebo garori gururi gubai ġekoġoto-ġoi
aseġaġirito, ġekirato,
“Haleluia!

Vevaġa-maġuri, e mareva baregona,
ema seġuka tu ġita ġera Barau ġena.

² Korana ġia tu dabara roroġotonai evevaġa-
kotani ema rakava voiri evinini.

Ġia na veġura-vanaġi vavinena baregona vei-
rakava voina meto lelevaġina bevinia.

Mai veġura-vanaġi vavinena na mai tanobara
mabarana ġena veġura-vanaġi veiġana na
bevaġa-rakava kwaikwaia.

Barau na ġena vetuġunaġi tarimari rarari evaġa-
riġorito ġaramanai,

rakava voina meto lelevaġina bevinia.”

³ Ma ġekogo-ġenogoito, ġekirato,
“Haleluia!

Vanuġa baregona ġenana eraġeni goġuna tu asi
bedokoni,

mo goġu tu beraġe-vanaġi vanaġini.”

⁴ Benamo mo veġitaġau tarimari gabanana ru-
arua ma vasivasi (24) ema mo maġuri da-
garari vasivasi ġevetui-tarito, benamo Barau
ġena teronai tanutaġo ġetoma-rakariġo viniato-
ġoi, maiġesi ġekirato, “Amen, Haleluia!”

Mamoe Natuna ġena veġaraġo verekona

⁵ Benamo mo terona na garo ta eiaġomato,
ekirato,
“Barau ġena vetuġunaġi
tarimami mabarami,
e Barau garina ġogarini tarimami,
misina na beiaġo mo baregona,

ḡera Barau ḡovaḡa-raḡea!”

⁶ Benamo au na guru ta noḡa moḡo ḡutuma-barā
gururi kavana aseḡaḡiato, noḡa ḡaruka ḡutuma
ḡeḡaru-gwadani gururi kavana, ema noḡa guba
eguruani guruna baregona kavana, ḡekoḡoto-ḡoi,
ḡekirato,

“Haleluia!

Ĝita ḡera Iaru-korokoro Barauna tu roḡo Vere
baregona etanuni.

⁷ Mabarara si-iaku, siverere, ema sivaḡa-raḡea,
korana tu Mamoe Natuna ḡena
veḡaraḡo ḡarona varau bema raḡasi,
ema ḡaraḡona maki beġe ḡabi-torea.

⁸ Dabuḡa kurokurori gwaḡigiri namori, namoka-
namokana, miro misina ta maki asiġina
ḡinavaḡi na ḡevaḡa-dabuḡaiato.”

Mo dabuḡa kurokurori gwaḡigiri namori tu Barau
ḡena veaḡa tarimari ḡeri vei-iobukaiobuka eki-
raġirini.

⁹ Benamo mo aneru na au ekiraguto, ekirato,
“Maiġesi notorea: ‘Mamoe Natuna ḡena veḡaraḡo
ḡani-vegogona uranai ḡekea-kaurito tarimari tu
beġene iaku!’” Ma ekiraguto, ekirato, “Mai
tu Barau ḡena guruḡa moġoniri!” ¹⁰ Benamo
au mo aneru kwakuna koranai avetui-tarito,
natoma-rakariġo vinia ḡana. Senaġi ḡia na
ekira-ḡoiguto, ekirato, “Maniġesi tu asi novei!
Au maki vetuḡunaġi tarimagu ḡoi kavana, ema
ḡoi tarikakamu Iesu varina guruḡari ḡevaḡa-
moġonirini tarimari kavana. Barau moḡo notoma-
rakariġoa! Korana Iesu ḡena vevarifiu guruḡari
beġene kiraġi-foforiri.”

Hosi kurokuronai erağeto tarimana

¹¹ Ma au aboğeto, guba evekeoto, benamo ġoiragu ai hosi kurokura ta ağıtaiato. Mo hosi iatanai erağeto tarimana arana tu “Ve-tuġamägikä” ema “Moġoni” ġetato. Ĝia tu veiġa iobukaiobukanai evevaġa-maoroni ema evetarini. ¹² Ĝia matana tu karava moreri kavana, ema debanai korona tu asisebo. Ĝia ġenai ara ta evetoreto, mo ara tu ta asi ribana, ġia ġereġana moġo ribana. ¹³ Ĝia tu rara na evonuto dabuġana na evedabuġato, ema arana tu “Barau ġena Guruġa”. ¹⁴ Guba vanuġana ġena vetari doġorona tu ġia murina na ġeraka-naġi-rakanaġito-ġoi. Ĝia mabarari tu dabuġa gwaġigiri namori, kurokurori ema namoka-namokari na ġevedabuġato, ma hosi kurokurori ai ġerağeto. ¹⁵ Ĝia bokana na tu vetari baġana raga-rakavararakava ema raka-rosito. Tanobara irauirau beseri tu mai vetari baġana ma ragana mainana bebasirini. Ĝia na auri togoina na beġori-kaurini ma seġukana baregona ġesi. Ma vine ġwaġwari ġefanarini kavana bea fana-taririni. Moġa mo tu Iaru-korokoro Barauna ġena baru baregona bevaġa-raka-rosiani gabuna. ¹⁶ Dabuġa maukana eriġoato ġenai ema maninnai tu mai ara maiġa etoreato, “Kini mabarari ġeri Kini ema vere mabarari ġeri Vere.”

¹⁷ Benamo au na aneru ta ġaro nuġanai eruġatāġoto-ġoi ağıtaiato. Mo aneru na guba fakana ġerovoni manuri ekea-farara vinirito, ekirato, “Goiāġoma, Barau ġena ġanivegogo baregonai ġoma rovo-vegogo. ¹⁸ Be tanobara vereri barari

virigori, e vetari doğorori ġeri veġorikau tauri baregori viriġori, e kokore lelevaġi tarimari viriġori, ema hosi viriġori e hosi ai ġeraġeni tarimari viriġori, ema tarimarima mabarari, tuġu-rakaorakao tarimari e fakai ġetanuni tarimari, tarima keiri e baregori, mabarari viriġori boġonoma ġaniri!"

¹⁹ Benamo au na vevaġa-rakava dagarana ema tanobara vereri baregori ma ġeri vetari doğorori ġesi vegogotaġo aġitarito. Ĝia tu hosi kurokuronai eraġeto tarimana ma ġena vetari doğorori ġesi beġene vetari-viniri ġana ġevegogoto. ²⁰ Senaġi mo vevaġa-rakava dagarana ġegabi-tariato, ema peroveta tarimana ġofaġofana maki, mai tu nuġa-farevaġi vetoġari boruri vevaġa-rakava dagarana aranai eveirito-ġoi tarimana. Mai vetoġa boruri maiġeri na vevaġa-rakava dagarana ġena maka ġegabiato tarimari ema ġia vetoġana o laulauna dagarana ġetoma-rakariġoani tarimari eġofa-darererini. Ĝia tauri ruarua tu kou karavana morena asikeikeinai e salfa nuġanai ġefiu-ġurarito. ²¹ Ma kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia viriġori ġegani-ġosīġosirito.

20

Laġani 1,000 nuġanai kara beġorani

¹ Benamo au na aneru ta guba na emariġoto aġitaiato. Ĝimanai tu guri variġo kwareġana, (iauka rakavari ġeri dibura), kina, ema tavi ta

ḡimanai tu seini asikeikeina ta. ² Ġia na mo ḡuḡaia kavana dagarana baregona eḡabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ḡia tu laḡani 1,000 moḡesi barutarinai betanuni. ³ Ma aneru na eḡabiato, guri variḡo kwareḡanai efiu-ḡuraiato, benamo guri eloka-ḡauato, ema ekadakada-ḡauato. Aneru na Satani moḡesina eveiato anina tu, tanobara irauirau beseri asi bene ḡofari, bene iaḡo mo, laḡani 1,000 benea kori. Moḡa murinai bekeo-vagħiani, benamo murikai ḡaro viravira ta moġo ma betanuni.

⁴ Ma terona kotari ma aġitarito. Mo terona iatari ai tu Barau na Kota beġene seġaġi maorona evinirito tarimari ġetanuto. Ma aboġeto tu, Iesu varina guruġari ġevaġa-moġonirito e ġekiraġi-foforirito ema Barau ġena guruġa ġaramanai debari ġebasi-ġuturito tarimari iaukari maġuri aġitarito. Ġia tu mo vevaġa-rakava dagarana ema ġia vetoġana o laulauna ġeveiato dagarana asi ġetoma-rakariġo viniato, ema ġena maka bakuri ai o ġimari ai asi ġevaġa-kafarito. Ġia tu ġemaġuri-ġenogħito, benamo Keriso ġesi laḡani 1,000 ġevereto. ⁵ Mase na variġisi-ġenogħoi ginigu-inena tu moġa. Mase tarimari kotari tu asi roġo ġemaġuri-ġenogħito mo, laḡani 1,000 ea korito. ⁶ Mai mase na variġisi-ġenogħoi ginigu-inena beġe variġisini tarimari tu beġe iakuni ema vevaġanamo barego beġe doġariani. Ġia tu mase vaġaruwa seġukana na asi beġabirini. Ġia tu Barau ema Keriso ġeri Rubu Veāġa vereri ai beġe iaġoni, ema Keriso ġesi mo laḡani 1,000 nuġanai beġe

vereni.

Satani ġena keto

⁷ Mo laġani 1,000 bekorini murinai, Satani tu ġena dibura gabuna na beġe keo-vaġiani,
⁸ benamo beiaġoni, tanobara irauirau beseri tanobara daiguni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ĝia mabarari bea ġori-vegogorini, vetari beġene veia ġana. Ĝia mabarabarari beġe vegogoni tu, noġa kone mirina kavana asisebo-asisebo.
⁹ Tanobarana na beġe raka-iaġoni, benamo Barau ġena tarimarima ġetotoġato gabuna beġea gana-ġeġeraġiani. Mo totoġa gabuna tu Barau na eura-viniani sitina. Senaġi guba na karava emariġoto, benamo Satani ġena vetari doġorori ema ġararito. ¹⁰ Benamo Diabolo, eġofarito tauna, tu karava moreri e salfa kouna nuġanai beġe fiu-ġurajani. Vevaġa-rakava dagarana ema peroveta tarimana ġofaġofana tu monai varau ġefiu-ġurarito. Tauri toitoi tu monai mo karava moreri na vanagivanagi asi dokona asi magona beġara-tanurini.

Kota Baregona

¹¹ Moġa murinai au na terona kurokurna baregona ema terona iatanai etanuto tarimana aġitaiato. Tanobara ema guba ġia ġoirana na ġeraka-veġitato, benamo asi ma ġeġita-ġenogħirito. ¹² Benamo mase tarimari baregori ema keiri aġitarito mo terona kurokurna baregona ġoiranai. Benamo buka tari ekeorito. Mo buka ekeorito murinai tu, buka ta ma ekeoato, maġuri bukana tu moġa. Benamo mase tarimari

mo buka tari moğeri ai ġeri veiġa etore-vanaġirito ilailari ai Barau na ekota-vinirito. ¹³ Davarai ġemaseto tarimari davara na ġevariġisito, e Mase ema mase tarimari iaukari ġetanuni Gabuna (o Hades) na ġevariġisito. Benamo mabarabarari tata karakara ġeveirito ilailari ai ekota-vinirito. ¹⁴ Benamo Mase ema mase tarimari iaukari ġetanuni Gabuna (o Hades) na ġevariġisito tarimari tu, karava kouna nuġanai ġefiuflu-ġurarito. Mo karava kouna moġa, mo tu mase vaġaruaruna. ¹⁵ Bema tarima ta arana maġuri bukanai asi ġeġoitaġoato tarimana tu, mo karava kounai ġefiu-ġuraiato.

21

Guba ema tanobara variġuri

¹ Benamo guba variġuna ema tanobara variġuna aġitarito, korana tu guba guinena ema tanobara guinena tu ġerekwa-rekwato. Davara maki asīgi. ² Ma vanuġa baregona veaġħana aġitaiato, mo tu Ierusalema variġuna guba vanuġħana na Barau ġenana emariġoto-ġoi. Gia tu veġaraġo variġu vavinena ġaraġona ġena ġevaġa-dabuġgiani ema ġevaġa-vera ginikauani kavana. ³ Benamo garo baregona ta aseġaġiato terona na eiaġomato, maiġesi ekirato, “Toma Barau ġena tanu gabuna tu tarimarima ġesi, ġia toma tu tarimarima vefakari ai betanuni. Gia tu Barau ġena tarimarimai beġe iaġoni, ema Barau tauġena ġia seviseviri ai betanuni, [ema ġia ġeri Barau ai beiaġoni]. ⁴ Gia na matari gorari mabarari bedaurini. Mase e taġi-vanorovanoro

e tağitağī guruna ta ema midigumidigu tu beğe kori-ketovağini, korana tu dagara guineri mabarari ġekorito.”

⁵ Mo teronai etanuto Tarimana maiğesi ekirato, “Goğitaia, au tu dagara mabarabarari avağavariğū ġenogoirini.” Ma ekirato, “Maigeri gurūga tu notore-vanağiri, korana mai tu guruğā moğoniri ema ġeri ai boğō vetuğamağī-dadamağini maki.” ⁶ Ma ekiraguto, ekirato, “Mabarari beğe kori. Au tu Alefa ema Omega, (giniguinenemaginabina), matamana ema dokona. Bokana bekokeni tarimana tu au na mağuri nanuna, eğaruğaruani dagarana, asi voina, baviniani beniuani. ⁷ Rakava e meto bevağā-darererini tarimana, ġena kokore voina tu maiğeri mabarari beğaunarini, ema au tu ġia ġena Barau ai baiağoni, ema ġia maki au natugu ai beiağoni. ⁸ Senaġi gari ai asi ġeruğā-gwaġigini e asi ġeveğabi-dadamani tarimari, vei-rakava na ġevevağā-miroto tarimari, vevaġi-deba tarimari, ġekima-rakaorakaoni tarimari, ġemeğameğani e kwaivakuku ġetomarakariġo vinniani tarimari, ema ġegofaqofani tarimari, mabarabarari ġeri gabu tu karava moreri e salfa ġeġarani kouna. Mai tu mase vağaruaruana.”

Ierusalema variġuna

⁹ Ma aneru ta au ġegu ai eiaġomato. Ĝia tu mo aneru 7 guinenai ġimari tu diġu 7, mo diġu nuğari ai tu tarimarima vağā-midigu-midiguri dagarari oreri na ġevonuto aneruri ta. Ĝia eiaġomato, benamo au ema kiraguto, ekirato, “Noiāġoma, be veġaraġo variğū vavinena nama vağā-ġitamu,

ḡia tu Mamoe Natuna ḡaraḡona!” ¹⁰ Benamo Barau Iaukana na eborogiguto, ma aneru na ḡoro baregona e mauka kenenena ḡana eḡwaiāḡoguto. Benamo monana vau siti veaḡana, Ierusalema, Barau ḡenana guba vanuḡana na emariḡoto-ḡoi evaḡa-ḡitaguto. ¹¹ Ġia ḡenai tu Barau marevana mamana emamato-ḡoi, ema siti marevana vetoḡana tu fore namoka-namokari voiri asi keikeiri kavana, ema iaspa forena, fore veḡiaveḡiġana kavana emamato-ḡoi. ¹² Ġia maḡuna tu asikeikeina ema maukana, ma ḡatama bokana tu gabanana ruarua (12). Mo ḡatama-boka 12 tu aneru 12 na ḡeḡita-ḡaurito-ḡoi. Mo ḡatama-boka tata iatari ai tu Isaraela doğorori tata arari ḡetorerito, mo tu Isaraela doğorori 12 moğeri. ¹³ ḡatama-boka tu toitoi ḡaro eraġeni rekenai (o east), ma toitoi ḡaro evariḡoni rekenai (o west), ma debana rekenai (o north) toitoi, ema gabina rekenai (o south) toitoi ḡeveirito. ¹⁴ Vanuḡa baregona maḡuna tu korana o duḡu foreri 12 iatari ai ḡevaḡa-ruḡa-vaisiato. Moğeri fore iatari ai tu Mamoe Natuna ḡena apostolo 12 arari tata ḡetorerito, fore ta ara ta, ma fore ta ara ta.

¹⁵ Au ḡesi ḡaguruḡa-guruḡato-ḡoi mo aneru moḡa ḡimənai tu makamaka rulana o vevaḡa-vetovo dagarana, golo na ḡeveiato dagarana. Mo rula monana vanuḡa baregona e ḡatama bokana ema maḡuna bemakarini. ¹⁶ Siti ḡevaḡa-ruḡaiato daigunina tu vasivasi (4), e ḡena baḡaka ema mauka tu ilaila. Mo aneru na siti vevaḡa-vetovo dagarana na etovoato, makana eḡabiato tu stadia 12,000 o 2,400 kilomita. Ġia ḡena mauka e baḡaka

ema varāge maukana tu ilaila moḡo. ¹⁷ Maḡuna āgena barego maki etovoato, makana tu kiubit 144 o 70 mita. Tarimarima ġeri vevaġa-vetovo dagarana mo aneru na eġauvei-iägiato tu moġesina.

¹⁸ Vanuġa baregona maḡuna tu iaspa, fore marevari asi gadara dagarari, na ġeragaiato, ema siti tauġena tu golo namo vedauareari, ekimore-kimorerini galasi maki ġevanaġirito golori na ġeragaiato. ¹⁹ Vanuġa baregona maḡuna ġevaġa-ruġaiato korana o duġu foreri tu fore namoka-namokari irauirauri na ġevaġa-veraiato: Duġu forena giniguinenā tu iaspa forena, vaġa-ruaruana tu safafia, vaġa-toitoina tu kalakedo, vaġa-vasivasina tu emeral, ²⁰ vaġa-imaimana tu sadoniki, vaġa-6-na tu konilian, vaġa-7-na tu krisolait, vaġa-8-na tu beril, vaġa-9-na tu topas, vaġa-10-na tu krisopres, vaġa-11-na tu haiasin, vaġa-12-na tu ametis. ²¹ Mo ġatama-boka gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na ġeveirito. Ġatama-boka ta pel ta, ġatama-boka ta pel ta. Siti dabarana baregona tu golo namo vedaureana na, noġa galasi kavana na ġeveiato.

²² Vanuġa baregona nuġanai Rubu Veaġa ta asi aġitaiato, korana Vereġauka, Iaru-korokoro Barauna, ema Mamoe Natuna, ġia tu mo vanuġa barana ġena Rubu Veaġa. ²³ Mo vanuġa baregonai ġaro mamana ema ġue mamana tu asi bema-mani, korana Barau marevana mamana monai bemamani, ema Mamoe Natuna tu mo siti ġena lamefa. ²⁴ Tanobara mabarana besena tu ġia mamanai beġe rakani, ema tanobara vereri o

kiniri mabarari na dagara e farefare marevari namori monai beğea ġwa-toğarini. ²⁵ Ğaro sebona ta maki vanuğɑ barana ġatama bokana asi beğe biririni, korana mo siti tu boğɪ na asi beğabi-ğauanı. ²⁶ Tanobara irauirau mabarari ġeri farefare marevari ema ġeri tağɑ mabarana ġia ġena beğea ġwa-toğarini. ²⁷ Dagara ma mirona ta tu asi beraka-toğani, e maiaka ema ġofaġofa veiğari beveini tarimana ta maki asığına ġinavagħi beraka-toğani. Deidei Mamoe Natuna ġena mağuri bukanai arari etore-vanağirito tarimari ġereğari moğo beğe raka-toğani.

22

Mağuri nanuna ġarukana

¹ Moğɑ murinai aneru na mağuri nanuna ġarukana evağɑ-ğitaguto. Mo nanu tu negavağura-vağurana galasi kavana. Ma mo nanu tu Barau ema Mamoe Natuna ġeri terona na eğaru-rosito. ² Siti dabarana baregona nuğana ġana ġegaru-iağoto-ğoi. Mo ġaruka rikina reketa-reketai tu mağuri ġauri ġetubuto. Mo ġau tu ġue tata nuğari ai ġwaġwari ġegorato-ğoi, mai tu lağani sebona nuğanai nega vağɑ-12 ġegwato-ğoi; ema ġau lauri na tanobara mabarari beseri evağɑ-namorito-ğoi e evağɑ-mağuririto-ğoi. ³ Monana bevesinani beiaġoni, tarima ta iatanai o tanobara iatanai tovoğɑ ta tu asi ma betanuni. Barau ema Mamoe Natuna ġeri terona tu vanuğɑ baregona nuğanai, ma ġena vetuġunaġi tarimari na vetuġunaġina beğe iaġo-vinini. ⁴ Ĝia ġoירana beğe ġitaianī, ema ġia arana maki ġia bakuri ai

betanuni. ⁵ Monai bōgi tu asīgina. Lamefa ema īgaro mamari ta asi bēge ītaiāni e asi bēge urani, korana Barau, Veregauka na mama bevinirini. Ema īgia tu vere bēge tanu-vanāgi vanagini.

Iesu Veregauka ma bēgenōgoi-iāgomani

⁶ Benamo mo aneru na au evāga-gurūgaguto, ekirato, “Mai gurūga tu mōgoniri ema īgeri ai maki bovetūgamāgi-dadamāgini. Veregauka, īgia Iaukana tu peroveta tarimari mururi na egurūgani Barauna, īgena aneru etūguato, īgia īgena vetūgunāgi tarimari kara dori īgegorani dagarari bene vāga-̄gitari īgana. ⁷ Īosegāgi, au tu dori aiāgosini. Mai buka nūganai peroveta gurugāri bekorana-iāgirini tarimana tu bene iaku.”

⁸ Maīgeri dagara asēgāgirito ema āgitārito tarimana tu au, Ioane maīgegu. Maīgeri dagara asēgāgirito ema āgitārito nai tu, ekira-varaguto ema evāga-̄gitaguto aneruna kwakuna koranai avetui-tarito, natoma-rakarīgo vinia atato.

⁹ Senāgi īgia na ekiraguto, ekirato, “Manīgesi asi novei. Au tu īgoi, e īgoi tarikakamu peroveta tarimari, ema mai buka gurugāna īgekorana-iāgirini tarimari īgesi ilaila, Barau vetūgunāgina aiāgo-vinini. Barau notoma-rakarīgo vinia!”

¹⁰ Mōga murinai ekiraguto, ekirato, “Mai bukai peroveta gurugāri asi bono kada-̄gauri, asi bono kure-tōgari, korana nega tu varau bekavināgi.

¹¹ Vei-rakava tarimana bene vei-rakava-iāgo rōgo, veīga mirori eveini tarimana veīga mirori bene vei-iāgo rōgo, veīga iobukaiobukari eveini tarimana veīga iobukaiobukari bene vei-iāgo

rogo, ema veagai etanuni tarimana veagai bene tanu-iago.”

¹² Iesu maīgesi ekirato, “Gosegagi! Au tu dori aiāgosini! Tarimarima ġeri ġauvei voiri tu au ġegu ai, be aġwa-iagosirini. Tarimarima mabarari ġeri veiga e ġauvei ilailari ai voiri bavinirini. ¹³ Au tu Alefa ema Omega, (giniguinena ema dokona), au tu tovotovona veġata ema magona.”

¹⁴ Ĝeri dabuġa ġeguriġirini tarimari tu beġe iakuni. Ĝia tu Barau na maoro bevinirini, maġuri ġauna ġwana beġe ġaniani, ema vanuġa baregonha ġatama bokana na beġe raka-toġani. ¹⁵ A kwaiva (o vei-rakava tarimari), ġemeġameġani tarimari, ġekimani e ġeveġura-vanagħini tarimari, vevaġi-deba tarimari, kwaivakuk ġetoma-rakariġo vini-an tarimari, ema ġofaġofa ġeurredikani tarimari, mabarabarari tu siti murikanai beġe tanuni. ¹⁶ “Au, Iesu, na ġegu aneru batuġu-iagosia, eklesia doġorori ġeri mai vari moġonina ġomi neasi vaġa-ribami ġana. Au tu Davida garakana ema ġia ġenana aiaġomato Tarimagu. Au tu laġani visiġuna, ma mamana baregonha.”

¹⁷ Iauka Veaġa ema veġaraġo variġu vavinena ġekirani, “Noiaġoma!” Ema beseġaġini tarimana maki nekira, “Noiaġoma!” Bokana bekokeni tarimana bene iaġoma; ema beurani tarimana, mai maġuri nanuna, asi voina nanuna, bene niua.

Guruġa dokona

¹⁸ Mai bukai peroveta guruġari beġe seġaġirini tarimari mabarari akira-toreġaurini: Bema deikara na mai guruġa iatari ai guruġa tari betore-kaurini tarimana tu, mai bukai tarima

vaḡa-midiguri dasarari, ekiraḡirini dasarari, Barau na ġia iatanai betore-kaurini. ¹⁹ Ma bema tarima ta na mai peroveta bukana na guruġa tari bekoki-vaġirini nai, ġia tu Barau na voina maġuri ġauna ġenai ema siti veaġħana nuġanai monai tanu-vanaġivanaġi moġa, mai bukai ekiraġirini maig̊eri, ġia ġenana beġabi-vaġirini.

²⁰ Maiġeri dagara bekiraġi-foforirini tarimana ekirani, “Oi, au tu dori aiaġosini!”

Amen. Iesu Vereġauka o, noiāġoma!

²¹ Iesu Vereġauka ġena namo ema varevare-barā ġomi mabarami iatami ai bene tanu. Amen.

GINITAĞO VARIĞUNA
The New Testament in the Sinaugoro Language of
Papua New Guinea
Nupela Testamen long tokples Sinaugoro long Niugini

Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files
dated 22 Nov 2019

a998e4ce-f2f7-5577-968e-5d2feef358f1